

穀玉類編

卷十至  
卷十六

AE  
4  
W224  
V.3



EAST ASIAN LIBRARY  
RM. 8049 ROBARTS LIBRARY  
UNIVERSITY OF TORONTO  
TORONTO, CANADA M5S 1A5







卷四

四

兄弟

友愛

神祇

禮制

兄弟

兄弟之義上稱大兄其義在下則稱弟上稱兄下稱弟

兄弟之義上稱大兄其義在下則稱弟上稱兄下稱弟

兄弟之義上稱大兄其義在下則稱弟上稱兄下稱弟

兄弟之義上稱大兄其義在下則稱弟上稱兄下稱弟







穀玉類編卷十

休寧 汪兆舒果齋輯

庭闈類四

兄弟

友愛

姊妹

妯娌

兄弟

馮野王爲上郡太守。其弟立。竟寧中出爲上郡。治行畧與野王相似。而多知。有恩貸。吏民歌之曰。大馮君。小馮君。兄弟繼踵相因循。聰明賢知惠吏民。政如魯衛德化鈞。周公康叔猶二君。

漢書

賈彪兄弟三人。並有高名。而彪最優。故天下稱曰。賈氏三虎。偉節。



最怒。後漢書

許邵汝南平輿人有高名。兄虔亦知名。汝南人稱平輿淵有二龍焉。

陳元方子長文與季方子孝先各論其父功德爭之不能決咨於太邱太邱曰元方難爲兄季方難爲弟。世說

京兆田真兄弟三人分財。生貲皆平均。惟紫荆樹一株共議欲破三片。其樹卽枯死。狀如火燃。真大驚。謂諸弟曰。樹本同株。聞將分斫。所以顛頓。是人不如木也。因不截取。樹應聲榮茂。兄弟相感。合財寶。遂爲孝門。齊諧記

馬良兄弟五人並有才名。鄉里爲之諺曰。馬氏五常。白眉最良。良



眉中有白毛。故以稱之。蜀志

陸雲與兄機齊名。張協有儁才。與兄載齊名。協弟亢亦有屬綴。時人謂曰二陸三張。晉書

卞粹以清辨稱。兄弟六人。並登宰府。世稱卞氏六龍。元仁無雙。戴逵厲操東山。而弟遙以武勇稱。謝安嘗謂遙曰。卿兄弟志業何殊。遙曰。下官不堪其憂家。兄不改其樂。

謝惠連十歲能屬文。族兄靈運嘉賞之。嘗於永嘉西堂思詩。竟日不就。忽夢見惠連。即得池塘生春草。大以爲工。南史

張岱。吳興太守。與兄太子舍人演。新安太守鏡。征北將軍永弟廣。州刺史辨。俱知名。謂之張氏五龍。南齊書



駙馬都尉王銓。學業不及弟錫。而孝行齊焉。時人以爲銓錫二王。可謂玉昆金友。南史

劉之亨。代兄之遴爲南郡太守。在郡有異績。荆土懷之。號爲大南郡小南郡。

到溉與弟洽俱有才學。時以比二陸。故世祖贈詩曰。魏世重雙丁。晉朝稱二陸。何如今兩到。復似凌寒竹。梁書

夏侯夔爲南豫州刺史。兄亶先經此任。並有恩惠。百姓歌曰。我之有州。頻仍夏侯。前兄後弟。布政優優。

陸曄與弟恭之。並有時譽。洛陽令賈禎見其兄弟。歎曰。僕以老年。

更覩雙璧。

魏書



魏景儀景禮並有才行。鄉人呼爲雙鳳。北史

薛元敬與兄收及族兄德音齊名。世稱河東三鳳。收爲長雛。德音

爲鶯鶯。元敬年最少。爲鵲雛。唐書

賈敦實爲洛州長史。寬惠。人心懷向。始敦實兄敦頤爲洛州司馬。洛人爲刻碑大市旁。及敦實入爲太子右庶子。人復爲立碑其側。故號常棣碑。

李乂事兄尚一尚貞。孝謹。又俱以文章自名。弟兄同爲一集。號李氏花萼集。

韋述有史才博識。弟迥迪。學業亦亞述。時趙冬曦兄弟亦各有名。張說嘗曰。韋趙兄弟人之杞梓。



宋庠與弟祁同舉進士。禮部奏祁第一。庠第三。章獻太后不欲以弟先兄。乃擢庠第一。寘祁第十。人呼曰二宋。以大小別之。宋史

洪适與弟遵同中博學宏詞科。後三年。弟邁亦中。是選由是三洪文名滿天下。

孫逢吉與弟逢年逢辰。皆有文學行義。時稱孫氏三龍。

李獻能昆弟。皆以文學名。從兄獻卿獻誠。從弟獻甫。相繼擢第。故

李氏有四桂堂。金史

回回與弟巉巉。皆爲時之名臣。世號爲雙璧。元史

端孝文翰林待詔。弟孝思翰林侍書。先後使朝鮮。並著清節。朝鮮

人爲立雙清館云。明史



楊守陳遷吏部右侍郎弟守陟博極羣書師事兄守陳學行相埒其爲解元學士侍郎皆與兄同又對掌兩京翰林院人尤豔稱之皇甫孝父錄弘治九年進士生四子冲孝汧濂冲汧同登嘉靖七年鄉薦明年汧第進士又三年孝第進士又十三年濂亦第進士而冲尚爲舉子兄弟並好學工詩稱皇甫四傑

魏允貞弟允孚允中皆有名劉廷蘭與兄廷蕙廷芥亦皆舉進士有名世稱南樂三魏漳浦三劉

### 友愛

謁也餘祭也夷昧也與季子同母者四季子弱而才兄弟皆愛之同欲立之以爲君謁曰今若迨而與季子國季子猶不受也請無



與子而與弟。弟兄迭爲君而致國乎季子。皆曰諾。故諸爲君者皆輕死。爲勇。飲食必祝曰。天苟有吳國。尚速有悔於予身。故謁也。死餘祭立。餘祭死。夷昧立。夷昧死。則國宜之季子者也。季子使而亡焉。公羊傳

趙孝王莽時。天下亂。人相食。孝弟禮爲餓賊所得。孝聞之。卽自縛詣賊。曰。禮久餓羸瘦。不如孝肥。賊大驚。並放之。孝辟太尉府。遷長樂衛尉。復徵禮爲御史中丞。禮亦恭謙。行已類於孝。顯宗嘉其兄弟篤行。欲寵異之。詔禮十日一就衛尉府。大官送供具。令相對盡歡。後漢書

鄭均兄爲縣吏。頗受禮遺。均數諫止。不聽。卽脫身爲傭。歲餘得錢



帛歸以與兄曰。物盡可復得。爲吏坐贓。終身捐棄。兄感其言。遂爲廉潔。

姜肱與二弟仲海季江友愛。天至常共臥起。及各娶妻。兄弟相戀。不能別寢。肱嘗與季江於道遇盜。欲殺之。兄弟更相爭死。賊遂兩釋焉。

李充家貧。兄弟六人同食遞衣。其妻竊謂充曰。今貧如此。難以久安。妾有私財。願思分異。充僞酬之曰。如欲別居。當醢酒具會。請鄉里內外議其事。婦從充。置酒讌客。充於坐中跪白母曰。此婦無狀。教充離間。母兄罪合。遣斥。便呵叱其婦。逐令出門。坐中驚肅。

裴楷營新宅。基宇甚麗。當移住。與其兄共游行。牀帳儼然。櫺軒疎



朗兄心甚願之。而口不言。楷心知其意。便使兄住。

裴楷別傳

王覽母朱氏遇覽兄祥無道。覽見祥被楚撻。輒涕泣抱持。每諫其母。其母少止凶虐。朱以非理使祥。覽輒與祥俱。又虐使祥妻。覽妻亦趨而共之。朱患之。乃止。祥喪父之後。漸有時譽。朱疾之。密使酖祥。覽知之。徑起取酒。祥疑其有毒。爭而不與。朱遽奪反之。自後朱賜祥饌。覽輒先嘗。朱懼覽致斃。遂止。

晉書

顏含有操行。兄畿病死復生。然氣息甚微。闔家營視。雖在母妻不能無倦。含乃絕棄人事。躬親侍養。足不出戶者十有三年。畿竟不起。次嫂樊氏因疾失明。醫人疏方。須蚘虵膽。尋求無由得之。含憂歎累時。忽有青衣童子持青囊授含。開視乃虵膽也。童子出戶化。



青鳥飛去。得膽藥成。嫂病卽愈。

庾袞。明穆皇后伯父也。咸寧中大疫。二兄俱亡。次兄毗。復危殆。癘氣方熾。父母諸弟。皆出次於外。袞獨畱不去。諸父兄強之。乃曰。袞性不畏病。遂親自扶持。晝夜不眠。其間復撫柩哀臨。如此十有餘旬。毗病得差。袞亦無恙。

李銓有至行。銓兄前母子。後母甚不愛。而衣食皆使下銓。銓始年五歲。覺已衣服勝兄。卽脫不著。須兄得與已同。然後服之。其母遂不得有偏。

陳畱志

謝述。兄純。在江陵遇害。述奉喪還都。至西塞。遇暴風。喪舫流漂。述乘小船尋求。冒浪而進。見純喪幾沒。號叫呼天。幸而獲免。咸以爲



精誠所致。兄景仁愛其弟。魁憎述。及景仁疾述。盡心營視。湯藥飲食。必嘗而後進。衣不解帶。不盥櫛者累旬。景仁感愧。友愛遂篤。南史

孫棘。宋大明五年。發三五丁。弟薩應充行。坐違期不至。棘詣郡辭。列棘爲家長。令弟不行。罪應死。薩又辭。列自引。太守張岱疑其不實。以棘薩各置一處。報云。聽其相代。顏色並悅。甘心赴死。棘妻許。又寄語屬棘君。當門戶。豈可委罪小郎。小郎未妻娶。君已有兒。死何恨。岱依事表上。孝武詔特原罪。并賜許帛二十匹。

清河房景伯。性淳和。諸弟宗之。如事嚴親。及弟亡。蔬食終喪。期不內御。其次弟景先亡。幼弟景遠。期年哭臨。亦不內寢。鄉里爲之語曰。有義有禮。房家兄弟。魏書



楊播昆季相事有如父子。播與弟椿。津旦則聚於廳堂。終日相對。未曾入內。有一美味不集不食。椿年老。曾他處醉歸。津扶持還室。仍假寐閣前。承候安否。椿津年過六十。並登台鼎。而津常旦暮參問。椿每近出。或日斜不至。津不先飯。椿還然後共食。初津爲肆州。椿在京宅。每有四時嘉味。輒因使次附之。若或未寄。不先入口。魏世以來。惟有盧淵兄弟及播昆季當世莫逮焉。

崔孝芬兄弟。孝義慈厚。弟孝演。孝政先亡。孝芬等哭泣哀慟。容貌損瘠。弟孝暉等奉孝芬。盡恭順之禮。坐食進退。孝芬不命。則不敢也。雞鳴而起。旦參顏色。一錢尺帛。不入私房。吉凶有須。聚對分給。諸婦亦相親愛。有無共之。



韋嗣立與兄承慶異母少友悌。母遇承慶嚴。每笞輒解衣求代。母不聽。卽遣奴自捶。母感悟爲均愛。世以比王覽。唐書

司馬光性孝友。其兄旦年將八十。光奉之如嚴父。保之如嬰兒。宋史張存嘗爲蜀郡。得奇繪文錦以歸。悉布於堂上。恣兄弟擇取。嘗曰：兄弟手足也。妻妾外舍人耳。奈何先外人而後手足乎？

汪應辰篤友愛。嘗以先疇遜其兄衢。雖無屋可居。不顧也。

浦江鄭德珪。德璋孝友。天至晝則聯几案。夜則同衾寢。德璋素剛直。讎家陷以死罪。當會逮揚州。德珪哀弟之見誣。陽謂曰：彼欲害我也。何預爾事？我往則姦狀白。卽治行。德璋追至諸暨道中。兄弟相持哭爭。欲就死。德珪默計阻其行。遂給以無往。夜從間道逸去。



德璋復追至廣陵。德珪已斃於獄。德璋痛絕者數四。負骨歸葬廬墓再期。

劉德泉早喪母。父榮再娶王氏。生子居敬。居元。德泉甚撫之。及王氏卒。益相友愛。父使析居。德泉泣止。不能得。乃各受其業。久之。父卒。兄弟相約。同爨和好如初。元史

劉德父娶後妻何氏。德事之如所生。四弟並何出。德撫愛尤篤。年五十未娶。稱貸得錢。先爲弟求婦。諸弟亦化其德。一門藹然。

黃璽字廷璽。兄伯震。商十年不歸。璽出求之。經行萬里。不得踪跡。最後至衡州。禱南岳廟。夢神人授以纏綿盜賊際。狼狽江漢行。二句一書生告之曰。此杜甫春陵行詩也。春陵今道州。盍往尋之。璽



從其言。一日入廁。置傘道旁。伯震適過之。曰。此吾鄉之傘也。循其柄而觀。見有餘姚黃廷璽記六字。方疑駭。璽出問訊。則其兄也。遂奉以歸。明史

韓邦奇嘗廬居。病歲餘不能起。弟邦靖藥必分。嘗飲食皆手進。後邦靖病亟。邦奇日夜持弟泣。不解衣者三月。及歿。衰絰蔬食。終喪勿懈。鄉人爲立孝弟碑。

姊妹

聶政爲嚴仲子報讎。刺殺韓相。因自皮面抉眼以死。韓取政屍暴於市。購之千金。莫知誰。政姊嫫聞之。乃之韓視之。曰。勇哉。氣矜之。隆今死而無名。爲我故也。夫愛身不揚弟之名。吾不忍。乃抱屍而



哭之曰。此吾弟軹。深井里聶政也。亦自殺。

戰國策

班超久在西域。年老思土。而超妹曹壽妻昭亦上書請超。和帝感其言。乃徵超還。

後漢書

李燮父固既策罷。遣三子歸鄉里。時燮年十三。姊文姬爲趙伯英妻。賢而有智。見二兄歸。默然獨悲。曰。李氏滅矣。密與二兄謀。預匿燮托言還京師。有頃。難作。下郡收固三子。二兄受害。文姬乃告父門生王成。委以六尺之孤。成感其義。將燮入徐州界內。燮名姓爲酒家傭。十餘年間。梁冀誅求固後嗣。燮乃還鄉里。姊弟相見。悲感旁人。

辛氏憲英。聰明有才鑒。弟敞爲曹爽參軍。宣帝將誅爽。因其從魏



帝出而閉城門。爽司馬魯芝斬關赴爽。呼敞同去。敞懼。問憲英曰。天子在外。太傅閉城門。人云將不利國家。於事可得爾乎。憲英曰。以吾度之。太傅此舉。不過以誅爽耳。曰。然則敞無出乎。憲英曰。安可以不出。凡人在難。猶或恤之。爲人執鞭而棄其事。不祥也。敞遂出。宣帝果誅爽。事定後。敞歎曰。吾不謀於姊。幾不獲於義。晉書

左芬少好學。善綴文。名亞於兄思。

元帝初納鄭后。后恒有憂色。帝問其故。對曰。妾有妹。中者已適長沙王褒。餘二妹未有所適。恐姊爲人妾。無復求者。帝因謂劉隗曰。鄭氏二妹。卿可爲求佳對。隗舉其從子傭娶第三者。以小者適漢中李氏。皆得舊門。



樂藹姊適徵士劉蚪。明識有禮訓。藹爲廣州刺史。迎姊居官舍。三分祿秩以供焉。

南史

劉孝綽三妹。適王叔英。張嶷。徐悱。並有才學。悱妻文。尤清拔。所謂劉三娘者也。

符承祖方用事。親姻多趨附以求利。其從母楊氏爲姚氏婦。獨否。嘗謂承祖之母曰。姊雖有一時之榮。不若妹有無憂之樂。姊與之衣裳。多不受。

齊書

李勣性友愛。其姊病。嘗自爲粥而燎其鬚。姊戒止。答曰。姊多疾而勣且老。雖欲數進粥。尚幾何。

唐書

裴守真官乾封尉。養寡姊謹甚。士推其禮法。永淳初。關中旱。悉稟



祿奉姊及諸甥身與妻息惡食不贍也。

姚廣孝本醫家子十四度爲僧名道衍成祖用兵有天下道衍力爲多拜資善大夫太子少師復其姓賜名廣孝至長洲候同產姊姊不納訪其友王賓賓亦不見但遙語曰和尚誤矣和尚誤矣復往見姊姊詈之廣孝惘然

明史

王蒙湖州人趙孟頫之甥也敏於文不尚槩度工畫山水兼善人物少時賦宮詞仁和俞友仁見之曰此唐人佳句也遂以妹妻焉。

妯娌

廣漢汝敦妻家世殷富而敦嫂貪吝敦所受三百餘萬悉讓於兄裁畱地起舍耕作土中得金一器妻曰本言讓先祖所有此獨非



其有耶。敦曰。固吾意也。乃共擔金與兄嫂。嫂見金而喜。兄乃感悟。

棄妻還金。

列女傳

王渾妻鍾氏。字琰。禮儀法度。爲中表所則。渾弟湛妻郝氏。亦有德。行琰雖貴門。與郝雅相親重。郝不以賤下琰。琰不以貴陵郝。

晉書

范陽太守鄭瓊。兄弟雍睦。其諸娣姒亦咸相親愛。閨門之內。有無相通。爲時人所稱美。

魏書

崔慤幼聰敏。濟州刺史盧尚之。欲以長女妻之。慤叔父休。爲子悽求尚之次女。曰。家道多由婦人。欲令姊姝爲妯娌。尚之感其義。於是同日成婚。

北史

李光進。歷官振武節度使。弟光顏。洛州刺史。光顏先娶。母委以家



事及光進娶母已亡弟婦籍貲貯納管鑰於姒光進命反之曰婦逮事姑且嘗主家事不可改因相持泣如初

唐書



穀玉類編卷十一

休寧 汪兆舒果齋輯

姻連類

外祖外孫

舅甥

中表兄弟

翁壻

姊夫妹夫婦兄弟

聯襟

附妾婢

附僕

外祖外孫

楊惲母司馬遷女也。惲始讀外祖太史公記。頗爲春秋。以材能稱。

遷既死。惲祖述其書。遂宣布焉。

漢書

魏舒少孤。爲外家甯氏所養。甯氏起宅相宅者云。當出貴甥。外祖



母以魏氏甥小而慧意謂應之舒曰當爲外祖成此宅相舒後官

至司徒

晉書

袁湛少有雅操爲外祖謝安所知以姪元女妻之

范岫幼而好學事母以孝聞外祖顏延之早相題目以爲中外之

寶

南史

王筠清靜好學沈約見筠以爲似外祖袁粲謂僕射張稷曰王郎非惟額類袁公風韻都欲相似

王褒七歲能屬文外祖司空袁昂愛之謂賓客曰此兒當成吾宅

相褒後官至尚書左僕射

梁書

皇甫績三歲而孤爲外祖韋孝寬所鞠養嘗與諸外兄博奕孝寬



督以嚴訓。績感悔。命左右自杖。孝寬聞而對之泣。於是博涉經史。

成大儒。

隋書

楊於陵見識於韓滉。滉妻以女。既而生嗣。復滉撫其頂曰。名與位。皆踰其父。楊氏之慶也。因字曰慶門。嗣復後官至宰相。

唐書

宋綬幼聰慧。爲外祖楊徽之所器愛。家藏書悉與綬。綬母亦知書。躬自訓教。以故博通經史百家。

宋史

虞汲娶楊氏。國子祭酒文仲女。文仲守衡。以汲從。未有子。禱於南嶽。集之將生。文仲夢一道士至前。牙兵啟曰。南嶽真人來見。既覺。聞甥館得男。心頗異之。文仲世以春秋名家。而族弟棟明於性理之學。楊氏在室。卽盡通其說。故集與弟槃受業家庭。具有源委。

元史



彭澤幼學於外祖段堅有志節。明史

舅甥

我送舅氏。曰至渭陽。何以贈之。路車乘黃。我送舅氏。悠悠我思。何

以贈之。瓊瑰玉佩。

晉公子重耳秦康公舅也。出亡在外。穆公召而納之。時康公爲太子。送之渭陽。作此詩。○詩經

霍諝少爲諸生。有人誣諝舅宋光。於大將軍梁商者。坐繫詔獄。掠

考諝。奏記於商。商高諝才志。奏原光罪。後漢書

衛玠風神秀異。驃騎將軍王濟玠之舅也。儁爽有風姿。每見玠。輒

歎曰。珠玉在側。覺我形穢。又曰。與玠同遊。罔若明珠之在側。朗然

照人。

晉書

王忱弱冠知名。嘗造其舅范甯。甯曰。卿風流儁望。真後來之秀。忱



曰。不。有。此。舅。焉。有。此。甥。

韓伯清和有思理。其舅殷浩稱之曰。康伯能自標置。居然是出羣之器。

鎮南將軍王延之與光祿大夫阮韜俱領軍。劉湛外甥。並有早譽。湛甚愛之。曰。韜後當爲第一。延之爲次也。南齊書

陸杲好學。工書畫。其舅張融有高名。杲風韻舉動。頗類於融。時人稱曰。無對日下。惟舅與甥。梁書

劉孝綽七歲能屬文。其舅中書郎王融深賞異之。每曰。天下文章。若無我。當歸阿士。阿士。孝綽小字也。

謝蘭五歲時。每父母未飯。不先飯。其舅阮孝緒歎曰。此兒在家則



曾子之流。事君則蘭生之匹。因名之曰蘭。稍授以經史。過目便能諷誦。孝緒每曰。吾家陽元也。

江總依於外氏。聰敏有至性。舅吳平侯蕭勸名重當時。特所鍾愛。嘗謂總曰。爾操行殊異。神采英拔。後之知名。當出吾右。陳書

李繪神情朗雋。河間邢晏。卽繪舅也。與繪清言。歎其高遠。每稱曰。若披雲霧。如對珠玉。宅相之寄。良在此甥。北齊書

趙安仁女弟適董氏。早寡。安仁取歸。給養。甥靈運尚幼。躬自訓導。爲畢婚娶。宋史

姚希孟生十月而孤。母文氏勵志鞠之。稍長。與舅文震孟同學。並負時名。舉進士。改庶吉士。震孟亦取上第。入翰林。甥舅並持清議。



望益重。明史

中表兄弟

杜鄴母張敞女也。鄴從敞子吉學。吉子竦又幼孤。從鄴學問。亦著

於世。漢書

鍾瑾母李膺姑也。瑾好學慕古。與膺俱有聲名。膺祖太尉修嘗言

瑾似我家性。邦有道不廢。邦無道免於刑戮。復以膺妹妻之。後漢書

梁武帝謂周捨云。爲我求一人文學俱長。兼有行者。欲令與晉安

游處。捨云。臣外弟徐摛形質陋小。若不勝衣。而堪此選。乃以摛爲

侍讀。南史

盧元爲中書博士。司徒崔浩元之外兄。每與元言。輒歎曰。對子真



使我懷古之情更深。魏書

李行之風素夷簡。范陽盧思道是其舅子。嘗贈詩云。水衡稱逸人。

潘楊有世親。形骸預冠蓋。心思出風塵。時人以爲實錄。北齊書

孔若思陳亡。客居鄆。勵志於學。外兄虞世南曰。本朝淪覆。吾分湮

滅。有弟若此。知不亡矣。唐書

賀知章與族姑子陸象先善。象先嘗謂人曰。季真清談風流。吾一

日不見。則鄙吝生矣。

韋景駿爲肥鄉令。子述從到官。元行冲景駿姑子也。爲時儒宗。嘗載書數車。自隨。述入其室觀書。不知寢食。行冲異之。與語前世事。熟復詳諦。使屬文。受紙輒就。行冲曰。外家之寶也。



皇甫淳兄弟與黃魯曾省曾爲中表兄弟。文藻亦相似。明史

翁壻

妻之父爲外舅。妻之母爲外姑。女之夫爲壻。壻之父爲姻。婦之父

爲婚。爾雅

東齊之間。壻謂之倩。方言

陳平少家貧。好讀書。戶牖富人。有張負。女孫五嫁。而夫輒死。人莫敢娶。平欲得之。邑中有喪。平侍喪。負見之。喪所獨視。偉平去。負隨至其家。門外多有長者車轍。負歸。謂其子仲。以女孫予陳平。史記馬融美辭貌。有俊才。初京兆摯恂。以儒術教授。隱於南山。不應徵聘。融從其游學。通經籍。恂遂奇融才。以女妻之。後漢書



孫儁與李膺俱娶太尉桓焉女。時人謂桓叔元兩女俱乘龍。言得

壻如龍也。

楚國先賢傳

張華少孤貧。牧羊鄉人。劉放奇其才。以女妻之。

晉書

衛玠好言元理。妻父樂廣有海內重名。議者以爲婦公冰清女壻

玉潤。

王羲之少知名。太尉郗鑒使門生求壻於王導。導令就東廂觀子弟。門生歸謂鑒曰。王氏諸少並佳。然聞信至。咸自矜持。惟一人在東牀坦腹食。獨若不聞。鑒曰。正此佳壻耶。訪之。乃羲之也。遂以女妻之。

殷州刺史杜廣初爲劉景廆卒。以馬肥良。引爲直士。侍立通夜。未



曾休倦。景執其手曰。吾久負賢者。謂其妻曰。爲女求夫三年。不覺。廢有麒麟。於是妻之。

三十國春秋

劉昶年十四。就博士郭瑀學。時瑀有女始笄。妙選良耦。有心於昶。遂設一席於坐前。謂諸弟子曰。吾有女長成。欲覓一快婿。誰坐此席者。吾當婚焉。昶遂奮衣來坐。神志肅然曰。先生欲求快婿。昶其人也。瑀遂以女妻之。

魏書

楊於陵始爲句容主簿。節度使韓滉剛嚴少許可。獨奇於陵。謂妻柳曰。吾求佳婿。無如於陵賢。因以妻之。於陵官至太子少傅。封弘

農郡公。唐書

獨孤郁擢進士第。爲權德輿所稱。以女妻之。俄擢翰林學士。德輿



輔政。憲宗歎德輿乃有佳壻。詔宰相高選世族。故杜棕尚岐陽公。主然帝猶謂不如德輿之得郁也。

趙昌言掌漕湖外。時王旦宰平江。昌言一見識其遠大。以女妻之。

旦後爲賢相。

宋史

馬亮知福州。呂夷簡少時從其父蒙亨爲縣福州。亮見而奇之。妻以女。妻劉恚曰。嫁女當與縣令兒耶。亮曰。非爾所知也。

張雍歷官尚書右丞。卒年七十。雍姿貌魯樸。始爲滕中正壻。中正子錫世寧咸笑之。中正曰。此人異日必顯達壽考。非汝曹所及。張汝明少嗜學。入太學有聲一時。國子司業黃隱將以子妻之。汝明約無飾華侈。協力承親歡。然後受室。



程敏政十歲以神童薦。英宗召試悅之。詔讀書翰林院。給廩餼。學士李賢愛重之。以女妻焉。明史

陳東生而聰慧絕倫。好讀古書。會稽侍郎董玘官翰林時。聞東才。召視之。東垂髻而前。試詞賦立就。遂字以女。

### 姊夫妹夫婦兄弟

顏讎由以非罪執。子路請以金贖焉。二三子納金於子路。或謂孔子曰。受人之金。以贖其私暱。義乎。孔子曰。義而贖之。貧取於友。非

義而何。

讎由乃子路妻兄。孔叢子

魏公子無忌。魏安釐王弟也。秦圍趙邯鄲。公子姊爲趙平原君夫人。數遣魏王及公子書請救。魏王不聽。公子乃矯魏王令代晉鄙。



勒兵擊秦軍。秦軍解去。遂存趙。史記

郭林宗家貧。欲游學。無資。就姊夫貸錢五千。乃遠至成臯。從師受

業。漢書

阮瞻善彈琴。內兄潘岳每令鼓琴。終日達夜。無忤色。晉書

臨海太守郗愔與姊夫王羲之並有邁世之風。俱棲心絕穀。修黃老之術。

劉穆之少時家貧。誕節。好往妻兄家乞食。多見辱。其妻江甚明識。每禁不令往。江氏後有慶會。穆之猶往。食畢求檳榔。江氏兄弟戲之曰。檳榔消食。君乃常飢。何忽須此。及穆之爲丹陽尹。將召妻兄弟。妻泣而致謝。穆之曰。本不匿怨。無所致憂。及至醉。穆之令廚人



以金梓貯檳榔一斛以進之。南史

蘇威有從父妹適元世雄。世雄先與突厥有隙。突厥入朝。請世雄及其妻子將甘心焉。周遣之。威遂賣田宅罄資產以贖世雄。論者義之。北史

呂希哲爲兵部員外郎。范祖禹其妹壻也。言於哲宗曰。希哲經術操行。宜備勸講。臣以婦兄之故。不敢稱薦。今將引去。竊謂無嫌。詔以希哲爲崇政殿說書。宋史

邵方。丹陽大俠也。故相高拱家居。方走謁。爲營復相。名傾中外。萬曆初。拱罷。張居正屬巡撫捕殺方。并逮其子儀。儀甫三歲。捕者以日暮未發。閉方所居宅守之。方女夫武進沈應奎。義烈士。時爲諸



生將往救之。而府推官與應奎善。固邀飲。夜分乃罷。武進距方居五十里。應奎踰城出。夜半抵方家。踰牆入。義婢邵氏方坐燈下。抱儀泣曰。安得沈郎來。屬以此子。應奎倉猝前。婢立以儀授之。應奎匿。儀去。復晨謁推官。旦日捕者失儀。繫婢毒掠。終無言。或言於守曰。必應奎匿之。奎所善推官在坐。大笑曰。冤哉。應奎夜飲於余。晨又謁余也。會有爲方解者。事乃寢。明史

聯襟

兩壻相謂爲亞。

小雅曰。瑱瑱姻亞是也。爾雅

碩人其頤。衛侯之妻。邢侯之姨。譚公維私。

詩經

中大夫嚴助侍燕。上問助居鄉里時。對曰。家貧爲友壻。富人所辱。



姊妹夫婿兄弟類郡方術沈奏作  
日義婢部氏位宜另摘入義婢類

願爲會稽太守

漢書

周公瑾爲中護軍從孫策攻皖得喬公兩女皆國色策自納大喬公瑾納小喬策從容戲公瑾曰喬公二女雖流離得吾二人爲壻亦足爲歡

吳志

蕭嵩娶賀晦女僚壻陸象先宰相子時爲洛陽尉已有名而嵩汨汨未仕人不之異夏榮者善相謂象先曰君後十年貴冠人臣然不若蕭郎位高年艾舉門蕃熾嵩後兼中書令封徐國公子華工部侍郎衛尚主嵩年踰八十士豔其榮

唐書

李漢韓愈之門人與薛孫皆爲愈子壻時人稱爲雙璧

合璧事類

唐彭伉登第其妻與郡吏湛賁之妻兄弟也妻族賀伉坐上皆名



士獨飯賁於後閣。賁自是力學。擢上第。伉方過赤板橋。聞之失聲。

墜驢。因改橋名湛郎橋。在袁州府城東。廣輿記

歐陽修與王拱辰皆薛簡肅奎壻。修先娶長女。拱辰娶其次。後修

再娶其妹。故有舊女壻爲新女壻。大姨夫作小姨夫之戲。合璧事類

常安民以教授秩滿寓京師。妻孫氏與蔡確之妻兄弟也。確時爲

相。安民惡其人。絕不相聞。確夫人使招其妻。亦不往。宋史

張方平子恕娶滕達道第五女。與何洵真王渙之並爲友壻。時人

目爲三鳳。

妾婢

齊桓公多內寵。如夫人者六人。左傳



鄭元家奴婢皆讀書。嘗使一婢不稱旨。將撻之。須臾有一婢來問曰。胡爲乎泥中。答曰。薄言往愬。逢彼之怒。

世說

石崇有妓曰綠珠。美而豔。善吹笛。孫秀使人求之。崇曰。綠珠吾所愛。不可得也。秀怒。矯詔收崇。崇正宴於樓上。謂綠珠曰。吾今爲爾得罪。綠珠泣曰。當效死於官前。因自投樓下而死。

晉書

李氏絡秀。少時在室。周浚爲安東將軍。嘗出獵。遇雨。過止絡秀之家。會其父兄不在。絡秀聞浚至。與一婢於內宰豬羊。具數十人饌。甚精辦。而不聞人聲。浚使覘之。獨見一女子甚美。浚因求爲妾。其父兄不許。絡秀曰。門戶殄瘁。何惜一女。若連姻貴族。將來庶有大益。父兄許之。遂生子顗。嵩。謨。由此李氏得爲方雅之族。



王獻之愛妾桃葉嘗臨渡獻之歌以送之曰桃葉復桃葉渡江不

得楫但渡無所苦我自迎接汝後人因名渡曰桃葉渡

古今樂錄

樂府有碧玉歌宋汝南王所作劉碧玉汝南王妾王寵愛之甚所

以歌之

樂苑

河間王琛有婢朝雲善吹箎能爲團扇歌隴上聲琛爲秦州刺史

諸羌叛討之不降琛令朝雲假爲貧嫗吹箎而乞羌聞之悉流涕

曰何爲棄墳井在山谷爲寇也卽相率降秦民語曰快馬健兒不

如老婢吹箎

伽藍記

崔寧爲劍南節度使會入朝蜀將楊子琳以精騎數千突入成都

據其城寧有妾任氏魁偉果幹出家財十萬募勇士得千人設隊



韓文公侍姬徐壽陽解  
志曰月圓圖似五作圓圖  
以圖字不入寒錄

伍將校手自麾兵以逼子琳子琳懼遁去舊唐書

關盼盼徐州節度使張建封侍姬也善歌舞能詩建封卒盼盼不  
嫁居燕子樓十餘年一日得白樂天和詩泣曰自我公薨妾非不  
能死恐百載後以我公重色有從死之妾也乃不食而卒廣輿記

白樂天有二妾樊素善歌小蠻善舞樂天詩曰櫻桃樊素口楊柳

小蠻腰全唐詩話

韓退之有二侍姬柳枝絳桃初退之奉使王庭湊至壽陽驛有詩  
云風光欲動別長安春半邊城特地寒不見園花并巷柳馬頭惟  
有月團圓蓋有所屬也迨奉使歸柳枝踰後園竄去家人追獲詩  
云別來楊柳街頭樹擺亂春風只欲飛惟有小桃園裏住畱花不



發待郎歸。自是專屬意絳桃矣。

語林

花雲方戰急。妻郃挈三歲兒泣語家人曰。城破。吾夫必死。吾義不獨存。然不可使花氏無後。若善撫之。雲被執。郃赴水死。侍兒孫。瘞畢。抱兒行。被掠至九江。孫夜投漁家。脫簪珥屬養之。及漢兵敗。孫復竊兒走渡江。遇僨軍奪舟棄江中。浮斷木入葦洲。採蓮實哺兒。七日不死。夜半有老父雷老。挈之行。踰年達太祖所。孫抱兒拜泣。太祖亦泣。寘兒膝上。曰。將種也。賜雷老衣。忽不見。賜兒名煒。累官水軍衛指揮僉事。後郃贈貞烈夫人。孫贈安人。立祠致祭。

明史

王翺爲都御史時。夫人爲娶一妾。逾半載。語翺。怒曰。汝何破我家法。卽日具金幣返之。妾終不嫁。曰。豈有大臣妾嫁他人者。翺卒。



妾往奔喪其子養之終身。

僕

臧甬侮獲奴婢賤稱也。荆淮海岱之間罵奴曰臧。罵婢曰獲。齊之北鄙燕之南郊凡民男而壻婢謂之臧。女而婦奴謂之獲。方言

晉侯逆夫人嬴氏以歸。秦伯送衛於晉三千人。實紀綱之僕。左傳

衛青爲侯家人。少時歸。其父使牧羊。先母之子皆奴畜之。不以爲兄弟。常至甘泉居室。有鉗奴相青曰。貴人也。官至封侯。青歎曰。爲人奴虜得免笞罵足矣。安望封侯。史記

王仲翁補大將軍史。三歲間至光祿大夫給事中。署小苑東門候。出入從蒼頭廬兒。下車趨門。傳呼甚寵。漢書



李善南陽清陽人。本同縣李元蒼頭。建武中疫疾。元家相繼死。沒  
惟孤兒續。始生數旬。而貲財千萬。諸奴婢謀殺續。分其財產。善深  
傷李氏。而力不能制。乃潛負續逃去。隱瑕邱界中。親自哺養。乳爲  
生。湏續雖在孩抱。奉之不異長君。續年十歲。奉之不異長君。理舊  
業。告奴婢於長吏。悉收殺之。瑕邱令上書薦善行狀。光武詔拜善  
及續太子舍人。善再遷日南太守之官。過李元冢。未至一里。乃脫  
朝服。持鋤去草。及拜墓。哭泣甚悲。身自炊爨。執鼎俎以修祭祀。垂  
泣曰。君夫人善在此。盡哀數日。乃去。後漢書

陶潛爲彭澤令。不以家累自隨。送一力給其子。書曰。汝旦夕之費。  
自給爲難。今遣此力。助汝薪水之勞。此亦人子也。可善遇之。南史

甄琛舉秀才入都。嘗與客奕碁。蒼頭執燭。或睡則加杖。奴曰。郎君若爲讀書。執燭不敢辭。今奕碁是何事也。琛大慙。遂研習經史。後魏書

梁默者。梁士彥之蒼頭。驍武絕人。士彥每征伐。常與默陷陣。仕周致位開府。大業五年。從煬帝征吐谷渾。遇賊力戰而死。隋書

馬三寶。性敏。曾事柴紹爲家僮。紹尚平陽公主。高祖兵起。三寶奉公主遁。司竹園說賊何潘仁與連和。潘仁以百兵爲主衛。三寶自稱總管。撫接羣盜。兵至數萬。從平京師。拜太子監門率。封新興縣男。後高祖幸司竹園。顧謂曰。汝與兵處耶。衛青大不惡。唐書

陽城值歲飢。屏迹不過鄉里。有奴都兒。化其德。亦方介。自約。或哀



其餒與之食。不納。復致糠覈數斛。乃受。

蕭穎士有一僕。事之十餘年。每加箠楚。不堪其苦。人或激之使去。其僕曰。我非不能他從。所以遲留者。特愛慕其博奧耳。

世說

趙一德。被俘爲鄭畱守家奴。歷事三世。號忠幹。其主鄭阿思蘭。裂券縱爲良。一德將辭歸。會阿思蘭以冤被誅。詔簿錄其家。羣奴各亡去。一德獨奮曰。主家有禍。吾忍同路人耶。卽畱不去。詣中書。訴枉狀。得昭雪。還其所籍。阿思蘭母勞一德。分美田廬遺之。一德不受而去。

元史

阿寄者。淳安徐氏僕也。徐氏昆弟析產而居。伯得一馬。仲得一牛。季寡婦得阿寄。時年五十餘矣。寡婦泣曰。馬則乘。牛則耕。老僕何

益寄歎曰。主謂我不若牛馬耶。乃畫策營生。示可用狀。寡婦盡脫簪珥。得白金十二兩。畀寄。寄入山販漆。期年而三倍其息。歷二十。年。積資巨萬。爲寡婦嫁三女。婚二子。齋聘皆千金。又延師教二子。輸粟爲太學生。自是寡婦財雄一邑。及寄病且死。謂寡婦曰。老奴牛馬之報盡矣。出枕中二籍。則家鉅細悉均分之。曰。以此遺兩郎。君可世守也。旣沒。或疑其有私。竊啟其篋。無一金蓄。所遺一嫗一兒。敝縕掩體而已。

明史

薛瑄爲大理少卿。忤王振。誣劾論死。及當行刑。振蒼頭忽泣於纍下。問故。泣益悲。曰。聞今日薛夫子將刑也。振大感動。乃免。



穀玉類編

卷十一

古

寶曆堂

穀玉類編卷十一

穀玉類編卷十二

休寧 汪兆舒果齋輯

交際類一

朋友

交情

朋友

鄭當時年少官薄。然其游知交。皆其大父行。天下有名之士。史記

王吉與貢禹爲友。世稱王陽在位。貢公彈冠。言其取舍同也。漢書

尹敏與班彪相善。每相遇。輒日盱忘食。夜分不寢。自以爲鍾期伯

牙。莊周惠施之相得也。後漢書



廉范京兆人。與洛陽慶鴻爲刎頸交。時人稱曰。前有管鮑。後有慶廉。

李燮所交。皆舍短取長。好成人之美。潁川荀爽。賈彪。雖俱知名。而不相能。燮並交二子。情無適莫。世稱其正。

蔣元卿之還杜陵。荆棘塞門。惟羊仲求仲從之游。時人謂之二仲。  
羣輔錄

陳羣。父紀有盛名。孔融高才倨傲。年在紀羣之間。先與紀友。後與羣交。更爲紀拜。  
魏志

嵇康遠邁不羣。所與神交者。惟陳畱阮籍。河內山濤。河南向秀。沛

國劉伶。籍兄子咸。琅邪王戎。爲竹林之游。世所謂竹林七賢也。  
晉書

王濛與劉惔齊名相友善。濛每云：「劉君知我勝我自知。」

孔淳之隱剡山，嘗遇桑門釋法崇於二山，披襟領契，自以爲得意。

之交。

王智深  
宋紀

謝瞻不營當世，惟與范泰爲雲霞之交。

南史

謝靈運東歸，與族弟惠連、東海何長瑜、潁川荀雍、太山羊璿之以文章賞會，共爲山澤之游。時人謂之四友。

到溉與弟洽俱知名。樂安任昉大相賞好。昉爲御史中丞，後進皆宗之。時有彭城劉孝綽、劉苞、劉孺、吳郡陸倕、張率、陳郡殷芸、沛國劉顯及溉洽車軌日至，號曰蘭臺聚。

盧懷仁有行檢，善與人交。與琅邪王衍、隴西李壽之情好相得。嘗



與衍云。昔郭泰道廣。許邵知而不顧。嵇生峙立。鍾會遇而絕言。吾處季孟之間。去其太甚。衍曰然。北史

李白客任城。與孔巢父。韓準。裴政。張叔明。陶沔。居徂徠山。日沈飲。

號竹溪六逸。唐書

高啟家長洲北郭。與王行比隣。徐賁。高遜志。唐肅。宋克。余堯臣。張羽。呂敏。陳則。皆卜居相近。號北郭十友。又稱十才子。明史

孫一元徧遊中原。抵吳越。時劉麟以知府罷歸。龍霓以僉事謝政。並客湖州。與郡人故御史陸崑善。而長興吳琬隱居好客。三人者並主於其家。琬因招一元入社。稱苕溪五隱。

孟化鯉。河南新安人。孟秋荏平人。化鯉自貢入太學。卽與秋道義。

相勗。後爲吏部郎。而秋官尚寶比舍居。食飲起居無弗共者。時人稱二孟。

交情

管仲少時與鮑叔牙游。鮑叔知其賢。管仲貧困。常欺鮑叔。鮑叔終善遇之。不以爲言。管仲曰。生我者父母。知我者鮑子也。

史記

朱暉與陳楫交善。楫卒。有遺腹子友。暉常哀之。及桓虞爲南陽太守。召暉子駢爲吏。暉辭駢而薦友。虞歎息遂召之。

後漢書

太尉陳蕃謀誅中官。事泄遇害。宗族門生故吏皆斥免。禁錮友人朱震。時爲銓令。聞而棄官哭之。收葬蕃尸。匿其子。逸事覺。繫獄。合門桎梏。震受考掠。誓死不言。故逸得免。



雷義與陳重爲友。義舉茂才。讓於陳重。刺史不聽。義遂佯狂走。不應命。鄉里爲之語曰。膠漆自謂堅。不如雷與陳。

范式。山陽金鄉人。遊太學。與汝南張邵爲友。邵字元伯。二人並告歸鄉里。式謂元伯曰。後二年當還。將過拜尊親。乃共尅期日。後期方至。元伯白母。請設饌以候之。母曰。二年之別。千里結言。爾何相信之審耶。對曰。巨卿信士。必不乖違。至其日。巨卿果到。升堂拜飲。盡歡而別。式仕爲郡功曹。忽夢見元伯曰。我以某日死。當以爾時葬。子未我忘。豈能相及。式覺寤悲歎。告太守。請往奔喪。太守許之。式投其葬日。馳往。未到而喪已發引。旣至壙。將窆而柩不肯進。遂停柩移時。乃見有素車白馬。號哭而來。巨卿旣至。執紼而引柩於

是乃前式畱止冢次。爲修墳樹然後去。

荀巨伯遠看友人疾。適胡賊攻郡。友人曰。吾今死矣。子可去。巨伯曰。遠來相視。子令吾去。敗義以求生。豈荀巨伯所行耶。賊旣至。謂巨伯曰。汝何敢獨止。曰。友人有疾。不忍委之。寧以我身代友命。賊相謂曰。我輩無義之人。而入有義之國。遂班軍而還。一郡獲全。世說

張裔與楊恭友善。恭早死。遺孤未數歲。裔迎與分屋而居。事恭母如母。恭之子長。爲之娶婦。買田宅。使立門戶。蜀志

吳範交有終始。素與魏滕相善。滕嘗有罪。孫權責怒甚嚴。敢有諫者死。範乃髡頭。自縛詣門下。鈴下不敢白。範因突入。叩頭流血。言與涕並。良久。權意釋。乃免。滕見範謝曰。父母能生我。不能免我。



於死。丈夫相知如汝足矣。何用多爲。

吳志

魏元同與裴炎締交。能保終始。故號耐久朋。

唐書

狄仁傑爲并州法曹參軍。同府參軍鄭崇質母老且疾。當使絕域。仁傑謂曰。君可貽親萬里憂乎。詣長史蘭仁基。請代行。仁基咨美其誼。時方與司馬李孝廉不平。相語曰。吾等可愧矣。相待如初。楊憑貶臨賀尉。憑所善客徐晦者。第進士。擢櫟陽尉。憑得罪。姻友憚累。無往候者。獨晦至藍田。慰餞。宰相權德輿謂曰。君送臨賀。誠厚。無乃爲累乎。晦曰。方布衣時。臨賀知我。今忍遽棄耶。德輿歎其直。稱之朝。御史中丞李夷簡。遽表爲監察御史。晦過謝。問舉之。之由夷簡曰。君不負楊臨賀。肯負國乎。

白敏中渭南人。王起典文衡。欲舉敏中第一。嫌其與賀拔甚友。密令所知諭意。令絕之。旣而甚造門。左右給以他往。敏中躍出見賀。曰。吾可以一第負素交耶。遂不得首舉。廣輿記

歐陽修篤於朋友。生則振掖之。死則調護其家。宋史

巢谷游涇原。與河州將韓存寶相善。及存寶得罪。將就逮。謂谷曰。我死非所惜。顧妻子不免寒餓。橐中有銀數百兩。非君莫可使貽之者。谷許諾。卽變姓名。懷銀往授其子。人無知者。蘇軾與谷同鄉。幼與之游。及軾與弟轍在朝。谷未嘗一來相見。紹聖初。軾轍謫嶺海。平生親舊無相聞者。谷慨然自眉山徒步訪兩蘇。至梅州遺轍書。轍驚喜曰。此古之人也。旣見握手相泣。已而道平生。逾月不厭。



時谷年七十三將復見軾於海南轍憊而止之谷曰我自視未卽死也公無止我轍資遣之舟行會病死轍聞哭之失聲

鄒浩爲右正言諫立劉賢妃爲后削官羈管新州浩所與游田畫王回皆良士也初邸狀報立后畫謂人曰志完不言可以絕交矣浩得罪畫迎諸途浩出涕畫正色責之曰使志完隱默官京師遇寒疾不汗五日死矣豈獨嶺海之外能死人哉願君毋以此舉自滿士所當爲者未止此也浩謝曰君贈我厚矣回爲宗正寺簿浩南遷人莫敢顧回斂交游錢與治裝往來經理且慰安其母邏者以聞逮詣詔獄除名停廢

孫子秀與人交久而益親死生患難營救不遺力

陳旅游京師翰林侍講虞集見其所爲文歎曰此所謂我老將休  
付子斯文者矣薦之除國子助教歷官國子監丞旅每感集爲知  
已集歸田數載旅不計千里訪集於臨川集感其來畱旬日而別  
惓惓以斯文相勉集每與學者語必以旅爲平生益友也

元史

聶大年由仁和教諭薦入翰林始尚書王直以詩寄錢塘戴文進  
索畫自序昔與文進交嘗戲作詩一聯至是十年始成之大年題  
其後云公愛文進之畫十年不忘使以是心待天下賢者天下寧  
復有遺賢哉直聞其言不怒及大年疾篤作詩貽直有鏡中白髮  
難憐我湖上青山欲待誰句直曰此欲吾志其墓耳遂爲之志

明史

康海殿試第一授修撰與李夢陽詩文相倡和正德初劉瑾亂政



以海同鄉。慕其才。欲招致之。海不肯往。會夢陽下獄。書片紙招海。曰。對山救我。對山者。海別號也。海乃謁瑾。瑾大喜。爲倒屣迎。海因設詭辭說之。瑾意解。明日釋夢陽。踰年瑾敗。海坐黨落職。

吳廷舉在太學時。兄事羅玘。玘病痢。僕死。自煮藥飲之。負以如廁。一晝夜數十反。玘嘗語人曰。獻臣生我。獻臣廷舉字

穀玉類編卷十三

休寧 汪兆舒果齋輯

交際類二

師弟

名師

高弟

師弟

哀公問於子夏曰。五帝有師乎。子夏曰。臣聞黃帝學乎大墳。顓頊學乎線圖。帝嚳學乎赤松子。堯學乎務成子。舜學乎尹壽。禹學乎西王國。湯學乎貸子相。文王學乎錫疇子斯。武王學乎太公。周公學乎號叔。仲尼學乎老聃。此十二聖人。未遭此師。則功不能著。



乎天下。名不能傳乎後世。

韓詩外傳

張禹以經學精習。位丞相。成就弟子尤著者。彭宣至大司空。戴崇至少府。宣爲人恭儉有法度。而崇愷弟多智。禹心親愛崇。敬宣而疏之。崇每候禹。責師宜置酒設樂。與弟子相娛。禹將崇入後堂飲。食。婦女相對。優人筦絃鏗鏘。極樂昏夜乃罷。而宣之來也。禹見之於便坐。講論經義。日晏賜食。不過一肉。卮酒相對。宣未嘗得至後堂。及兩人聞知。各自得也。

漢書

云。敞師事吳章。王莽殺章。磔尸東市門。初章爲當世名儒。弟子千餘人。莽以爲惡人黨。皆禁錮。門人盡更名他師。敞時爲大司徒掾。自劾。吳章弟子收章尸歸棺斂葬之。

童子魏照求入事郭泰供給灑掃泰曰當精義詩書何來相近照曰經師易獲人師難遭欲以素絲之質附近朱藍

荀悅漢紀

鍾興從少府丁恭受嚴氏春秋恭薦興學行高明光武召見拜郎中令定春秋章句授皇太子又使宗室諸侯從興受章句封關內侯興自以無功不敢受爵帝曰生教訓太子及諸王侯非大功耶興曰臣師丁恭於是復封恭

後漢書

楊政少從范升受梁邱易升爲出婦所告坐繫獄政乃肉袒以箭貫耳抱升子伏道旁候車駕而持章叩頭曰范升三娶惟有一子今適三歲孤之可哀虎賁懼驚乘輿舉弓射之猶不肯去旄頭又以戟叉傷政胸政猶不退哀泣陳請有感帝心詔曰乞楊生師卽



尺一出升

廉范詣京師受業。事博士薛漢。後辟公府。薛漢坐楚王事誅。故人門生莫敢視。范獨往收斂之。吏以聞。顯宗大怒。召范入。詰曰。薛漢與楚王同謀。反亂天下。范公府掾敢收之何也。范叩頭曰。臣愚慙以爲漢等已伏誅。不勝師資之情。罪當萬死。上怒解。因貰之。

賈逵通經。門徒來學。不遠萬里。贈獻者積粟盈倉。世所謂舌耕也。  
拾遺記

王哀隱居教授。有門人爲本縣所役。告哀求屬令。哀曰。吾德薄。不足以蔭卿。屬之何益。乃步擔乾飯。兒負鹽鼓草屨。送所役生到縣。安邱令以爲詣已。出迎之。哀乃云。門生爲縣所役。故來送別。因執

手涕泣而去。令卽放之。

晉書

李謐博通諸經。初師事博士孔璠。數年後。璠還就謐。請業同門生爲之語。曰。青成藍。藍謝青。師何常在。明經。

魏書

李業興志學精力。師事徐遵明。時鮮于靈馥亦聚徒教授。業興詣靈馥。靈馥曰。李生久逐羌博士。何所得也。業興默爾不言。及靈馥說左傳。業興問大義數條。靈馥不能對。於是振衣起曰。羌弟子正如此耳。遂還。自此靈馥生徒傾學而就遵明。遵明學徒大盛。業興之爲也。

高祖鎮太原時。引張後胤爲客。以經授秦王。太宗卽位。賜晏月池。從容曰。今日弟子何如。後胤曰。昔孔子門人三千。達者無子男之



位臣贊翼一人乃王天下計臣之功過於先聖帝爲笑之

唐書

王通北面受學者皆當世偉人如竇威賈瓊姚義受禮溫彥博杜如晦陳叔達受樂杜淹房喬魏徵受書李靖薛方裴晞王珪受詩叔恬受元經董常仇璋薛收程元備聞六經之大義

程顥與弟頤講孔孟之學楊時調官不赴以師禮見顥於穎昌相得甚歡其歸也顥目送之曰吾道南矣又見頤於洛時蓋年四十矣一日頤偶暝坐時與游酢侍立不去頤旣覺則門外雪深一尺矣

宋史

王安石教子雱求師須博學善士或問發蒙何必爾王曰先入者

爲之主

晁氏客話

吳與弼躬親耕稼。非其義。一介不取。四方來學者。約已分少。飲食教誨不倦。其門人最著者曰。胡居仁。陳獻章。婁諒。次曰。胡九韶。謝復。鄭伉。明史

孔公恂。天順初授禮科給事中。大學士李賢言。公恂至聖後贊善司馬恂。宋大賢溫國公光後。宜輔導太子。帝喜。同日起拜少詹事。侍東宮講讀。入語孝肅皇后曰。吾今日得聖賢子孫。爲汝子傳。孝肅皇后者。憲宗生母。方以皇貴妃有寵。於是具冠服拜謝。宮中傳爲盛事云。

錢德洪。餘姚人。王守仁自尚書歸里。德洪偕數十人共學焉。四方士踵至。德洪與王畿先爲疏通其大旨。而後卒業於守仁。嘉靖初。



偕畿赴廷試。聞守仁訃。乃奔喪至貴溪。議喪服。德洪曰。某有親在。麻衣布經。弗敢有加焉。畿曰。我無親。遂服斬衰。喪歸。德洪與畿築室於場。以終心喪。

名師

董仲舒下帷講誦。弟子傳以久次相受業。進退容止。非禮不行。學士皆師尊之。史記

何休質樸訥口。而雅有心思。精研六經。世儒無及者。嘗作公羊墨守。左氏膏肓。穀梁廢疾。除北新長。作講舍。聚生徒數百。朝夕自往。勸解。儒化大行。漢書

楊雄好古而樂道。時有好事者。載酒肴從游學。而鉅鹿侯芭嘗從

雄居受其太元法言焉。

張楷通嚴氏春秋古文尚書。隱居弘農山中。學者隨之。所居成市。

華陰山南。遂有公超市。公超楷之字。後漢書。

馬融才高博洽。教養諸生。常有千數。涿郡盧植。北海鄭元。皆其徒也。嘗坐高堂。施絳紗帳。前授生徒。後列女樂。

沈麟士隱居吳羌山。講經教授。從學者數十百人。各營屋依止其

側。時爲之語曰。羌山中有賢士。開門教授。居成市。南史。

張偉學通諸經。講授鄉里。受業者常數百人。勤於教訓。雖有頑固不曉。偉告諭殷勤。曾無愠色。常依附經典。教以孝悌。門人感其仁

化事之如父。魏書。



常爽博聞強識。時戎車屢駕。貴游子弟未遑學術。爽置館溫水之右。教授門徒七百餘人。立訓甚有勸罰之科。弟子事之若嚴君焉。尚書僕射元贊。平原太守司馬貞安。著作郎程靈虬。皆爽教所就。柳宗元爲柳州刺史。南方爲進士者。走數千里從宗元游。經指授者。爲文辭皆有法。唐書

周敦頤學爲知道。程顥與弟頤往受業焉。敦頤每令尋孔顏樂處。所樂何事。二程之學源流乎此矣。故顥之言曰。自再見周茂叔後。吟風弄月以歸。有吾與點也之意。宋史

程頤誨人不倦。故學者出其門最多。淵源所漸皆爲名士。

許衡讀程朱書大有得。學者寢盛世祖以衡兼國子祭酒。擇蒙古

弟子俾教之。衡愛之。如子。出入進退。其嚴若君臣。其爲教。因覺以明善。因明以開蔽。課誦少暇。卽習禮。或習書算。久之。諸生人人自得。尊師敬業。元史

許謙開門講學。遠近皆來受業。其教人也。至誠諄悉。內外殫盡。討論講貫。終日不倦。及門之士千餘人。隨其才分。皆有所得。世稱爲白雲先生。

薛瑄提學山東。首揭白鹿洞學規。開示學者。延見諸生。親爲講授。才者樂其寬。而不才者憚其嚴。皆呼爲薛夫子。明史

曹端起嶠澠間。倡明絕學。霍州李德亦講學於其鄉。及見端。退語諸生曰。學不厭教。不倦。曹子之盛德也。至其知古今達事變。末學



鮮或及之。古云得經師易得人師難。諸生得人師矣。遂避席去。端亦高其行誼。命諸生延致之。講明正學。

高弟

孔子曰。吾有四友。自吾得回也。門人加親。非胥附乎。吾得賜也。遠方之士日至。非奔奏乎。吾得師也。前有光。後有輝。非先後乎。吾得由也。惡言不至於門。非禦侮乎。孔叢子

嚴彭祖與顏安樂俱事眭孟。孟弟子百餘人。惟二子能質問疑義。

孟曰。春秋之學在二子矣。由是公羊春秋有嚴顏之學。漢書

丁寬梁人也。初梁項生從田何受易。時寬爲項生從者。讀易精敏。才過項生。遂師何。學成。寬謝何東歸。何謂門人曰。易以東矣。

鄭元入關事馬融。融素驕貴。三年不得見。使高業弟子傳受於元。元日夜尋誦。未嘗怠倦。會融集諸生考論圖緯。聞元善算。乃召見元。因質諸疑義。問畢辭歸。融曰。鄭生今去。吾道東矣。後漢書

范縝從沛國劉瓛學。芒屨布衣。瓛門多車馬貴游。縝在其間。並無愧耻。及長。博通經術。尤精三禮。南史

蓋文達明春秋三家。刺史竇抗集諸生講論。劉焯等以耆儒悉至。而文達依經辨舉。皆諸儒意所未叩。抗奇之。問從所學。焯曰。若人岐嶷出自天然。以多問寡。則焯爲之師。抗曰。冰生於水。而寒於水。其謂此耶。唐書

員半千始名餘慶。與何彥先事王義方。以邁秀見賞。義方曰。五百



歲一賢者生子宜當之。因改今名。

李穆從王昭素受易。及莊老書。盡究其義。昭素曰。子所得精理。往往出吾意表。且語人曰。李生異日必爲廊廟器。以所著易論授之。

宋史

馬默。單州人。徒步詣徂徠。從石介學。諸生時以百數。默一旦出其上。旣而將歸。介語諸生曰。馬君他日必爲名臣。宜送之山下。

李燔從朱熹學。熹嘉之。凡諸生未達者。先令訪燔。俟有所發。乃從熹折衷。諸生畏服。熹謂人曰。燔交友有益。而進學可畏。且直諒樸實。處事不苟。他日任斯道者。必燔也。

陳淳受教朱熹。熹曰。凡閱義理。必窮其源。淳聞而爲學。益力。日求。

其所未至。熹數語人。以南來。吾道喜得陳淳。

蔡清門人陳琛最著。琛杜門獨學。清見其文。異之。曰。吾得友此人足矣。琛因介友人見清。清曰。吾所發憤沉潛。辛苦而僅得者。以語人。常不解。子已盡得之。今且盡以付子矣。

明史

陸師道爲禮部主事。養母告歸。歸而游文徵明門。稱弟子。善詩文。工小楷。古篆繪事。人謂徵明四絕。不減趙孟頫。而師道並傳之。其風尚亦略相似。平居不妄交游。長吏罕識其面。



穀玉類編卷十三

穀玉類編卷十四

休寧 汪兆舒果齋輯

交際類三

賓主

好客

賓主

廉頗之免長平歸也。失勢之時。故客盡去。及復用爲將。客又復至。廉頗曰。客退矣。客曰。君何見之晚也。夫天下以市道交。君有勢則從。無勢則去。固其理也。有何怨乎。史記

汗明見春申君。三月乃見。春申君大悅之。汗明欲復談。春申君曰。



僕已知先生矣。汗明慨然曰：君之賢不如堯。臣之能不及舜。夫以賢舜事聖堯，三年而後乃相知也。今君一旦而知臣，是君聖於堯，而臣賢於舜也。春申君曰：善。乃召門吏，爲先生著客籍。五日一見。

戰國策

下邳翟公始爲廷尉，賓客闐門。及廢，門外可設雀羅。翟公復爲廷尉，賓客欲往。翟公乃大署其門曰：一死一生，乃知交情；一貧一富，乃知交態；一貴一賤，交情乃見。

史記

魏勃少時，欲求見齊相曹參。家貧，無以自通。乃常早夜掃齊相舍人門外。舍人怪之，以爲物而伺之，得勃。勃曰：願見相君。於是舍人見勃，參以爲舍人。

漢書

大將軍衛青既益尊。姊爲皇后。然汲黯與亢禮。或說黯曰。大將軍尊貴誠重。不可以不拜。黯曰。夫以大將軍有揖客。反不重耶。大將軍聞。愈賢黯。

平津侯自以布衣爲宰相。乃開東閣。營客館。以招天下之士。一日。欽賢館。以待大賢。次曰翹材館。以待大才。次曰接士館。以待國士。所得俸祿。以奉待之。

西京雜記

李元禮風格秀整。高自標持。後進之士。有升其堂者。皆以爲登龍門。世說

徐穉。豫章人。陳蕃爲太守。在郡不接賓客。惟穉來。特設一榻。去則懸之。後漢書



陳仲弓從諸子姪造荀季和父子。於是德星聚。太史奏五百里賢

人聚。

續晉陽秋

劉備屯於樊城。諸葛亮見備。備以諸生待之。備性好結髦。時適有  
髦牛尾與備者。備因手自結之。亮曰。將軍當復有遠志。但結髦而  
已。備知亮非常人。乃投髦而起。以上賓之禮待之。魏畧

蔡邕才學顯著。貴重朝廷。當賓客盈坐。聞王粲在門。倒屣迎之。魏志

侍中董允嘗與費禕胡濟等共期游晏。嚴駕已辦。而郎中董恢詣

允修敬。恢年少官微。見允停出。逡巡求去。允不許。曰。本所以出者

欲與同好游談也。今君已自屈。方展濶積。乃命解驂。不行。其下士

凡此類。蜀志

郗超爲大司馬桓溫參軍。溫傾意禮待。謝安與王坦之嘗詣溫論事。溫令超帳中臥聽之。風動帳開。安笑曰。郗生可謂入幕之賓矣。

晉書

車胤以博學知名。善於賞會。當時每有盛坐。而胤不在。皆云無車公不樂。謝安游集之日。輒開筵待之。

羊欣爲後軍府舍人。嘗詣領軍將軍謝混。混拂席改服。然後見之。族子靈運告其兄瞻曰。望蔡見羊欣。遂易衣改席。

宋書

庾杲之爲衛將軍王儉長史。安陸侯蕭緬與儉書曰。盛府元僚。實難其選。庾景行泛綠水。依芙蓉。何其麗也。時人以儉府爲蓮花池。故緬書美之。

南史



孔休源爲太學博士。寓於少府。孔登宅。侍中范雲命駕到少府門。登謂當詣已。旣而獨造休源。高談盡日。尚書令沈約。軒蓋盈門。休源或時後來。必虛襟引接。商畧文義。其爲通人所推如此。梁書

郎餘令博於學。授霍王元軌府參軍事。從父知年亦爲王友。元軌每曰。郎家二賢皆入府。不意培塿而松柏爲林也。唐書

顧德輝家世素封。輕財結客。跌宕自喜。年三十始折節讀書。購古書名畫。彝鼎祕玩。築別業於茜徑西。曰玉山佳處。晨夕與客置酒賦詩。其中四方文學士。河南張翥。會稽楊維禎。天台柯九思。永嘉李孝光。方外士張雨。于彥成。琦元璞輩咸主其家。園池亭榭之盛。圖史之富。暨餼館聲伎。並冠絕一時。而德輝才情妙麗。與諸名士

亦畧相當。明史

朱野航。葑門一老儒也。在荻扁王氏教書。野航與主人晚酌罷。主人入內。適月上。野航得句云。萬事不如杯在手。一生幾見月當頭。喜極發狂大叫。扣扉呼主人起。詠此二句。主人亦大擊節。取酒更酌。興盡而罷。明日徧請吳中善詩者賞之。大爲張具。徵戲樂畱連數日。何元朗叢說

### 好客

孟嘗君名文。招致諸侯賓客。舍業厚遇之。以故傾天下之士。食客數千人。無貴賤。一與文等。孟嘗君客無所擇。皆善遇之。人人各自以爲孟嘗君親已。史記



魏公子無忌仁而下士。士無賢不肖，皆謙而禮交之。士以此方數千里爭往歸之，致食客三千人。

鄭當時爲太子舍人，常置驛馬長安諸郊，存諸故人，請謝賓客。夜以繼日，至其明旦，常恐不徧，遷大農令，誡門下客至無貴賤，無畱門者，執賓主之禮，以其貴下人。

陳遵以功封嘉威侯，列侯近臣貴戚皆貴重之。牧守當之官及郡國豪傑至京師者，莫不相因到遵門，遵每大飲，賓客滿堂，輒關門取客車，轄投井中，雖有急終不得去。

漢書

崔瑗愛士，好賓客，盛修肴膳，單極滋味，居常疏食菜羹而已。

後漢書

孔融好士，賓客日盈其門，常歎曰：「坐上客常滿，尊中酒不空，吾無。」

憂矣。

大將軍長孫澄雅對賓客。接引忘疲。雖不飲酒。而好觀人酣興。常恐座客請歸。每勅中廚。別進異饌。畱之止。

周書

義陽郡王李抱真喜士。聞世賢者。必欲與之游。雖小善。皆卑禮厚幣。數千里邀致之。至無可錄。徐徐以禮謝。

唐書

張建封爲徐泗濠節度使。性樂士。賢不肖游其門者。禮必均。故其往如歸。許孟容韓愈皆奏署幕府。

石昂家有書數千卷。喜延四方之士。士無遠近。多就昂學問。食其門下者。或累歲。昂未嘗有怠色。

五代史

錢文僖守西都。謝希深歐陽永叔同在幕下。一日游嵩山歸。暮抵



龍門香山。俄而雪作。登石樓望都城。忽於烟靄中。有車馬渡伊水來。既至。則文僖遣厨傳歌妓至。傳公語曰。山行良佳。少畱龍門。賞雪無遽歸也。其高曠愛才如此。續世說

楊榮爲大學士。性喜賓客。雖貴盛。無稍崖岸。士多歸心焉。明史

廖莊爲刑部侍郎。性好存謝賓客。爲歡狎。既官法司。或勸稍屏謝往來。遠嫌疑。莊笑曰。昔人有言。臣門如市。臣心如水。吾無愧。吾心而已。

顧尚書璘。虛己好士。如恐不及。在浙。慕孫太初一元。不可得見。道衣幅巾。放舟湖上。月下見小舟泊斷橋。一僧一鶴。一童子煮茗。笑曰。此必太初也。移舟就之。遂往還無間。撫湖廣時。愛王廷陳。欲見

之。廷陳不可。偵廷陳狎游。疾掩之。廷陳避不得。遂定交。旣歸。構息園。大治。幸舍居客。客常滿。

王世貞主盟風雅。自李攀龍歿。獨操柄二十年。才最高。地望最顯。聲華意氣。籠蓋海內。一時士大夫及山人詞客。衲子羽流。莫不奔走門下。片言褒賞。聲價驟起。

謝榛刻意爲歌詩。西游彰德。爲趙康王所賓禮。康王卒。曾孫穆王亦賓禮之。酒闌樂止。命所愛賈姬獨奏琵琶。則榛所製竹枝詞也。榛方傾聽。王命姬出拜。光華射人。藉地而坐。竟十章。榛曰。此山人里言耳。請更製以備房中之奏。詰朝上新詞十四闕。姬悉按而譜之。明年元旦。便殿奏伎。酒止送客。卽盛禮而歸。姬於榛。



穀玉類編卷十四

穀玉類編卷十五

休寧 汪兆舒果齋輯

懷感類一

老壽

生日

嫁娶

生子

老壽

人生十年曰幼學。二十曰弱冠。三十曰壯。有室。四十曰強。而仕。五十曰艾。服官政。六十曰耆。指使。七十曰老。而傳。八十九十曰耄。百

年曰期頤。禮記

五十杖於家。六十杖於鄉。七十杖於國。八十杖於朝。九十者。天子



欲有問焉。則就其室以珍從。

小年不及大年。朝菌不知晦朔。蟪蛄不知春秋。此小年也。楚之南有冥靈者。以五百歲爲春。五百歲爲秋。上古有大椿者。以八千歲爲春。八千歲爲秋。而彭祖乃今以久特聞。

莊子

帝堯巡狩。觀於華。華封人曰。請祝聖人。使聖人多富多壽多男子。

帝曰辭。

通鑑

衛武公年九十有五。猶日箴儆於國。曰。在朝者。無謂我老耄而舍

我。必朝夕以交戒我。於是乎作懿戒以自儆。

國語

晉悼夫人食輿人之城杞者。絳縣人或年長矣。往與於食。有與疑年使之年。曰。臣不知紀年。臣生之歲。正月甲子朔。四百有四十五。

甲子矣。師曠曰：七十二年矣。趙孟使爲君，復陶以爲絳縣師。左傳

老子者，百有六十餘歲。或言二百餘歲，以其修道而養壽也。史記

孔子遊於泰山，見榮啟期，鹿裘素琴而歌。孔子問曰：先生所爲樂

者何？啟期曰：吾樂甚多，而至者三。天生萬物，惟人爲貴，吾得爲人

一樂也。男女之別，以男爲貴，吾得爲男，二樂也。人生有不見日月

不免襁褓者，吾旣行年九十五矣，三樂也。孔子家語

伏生故爲秦博士，孝文帝時求能治尚書者，欲召伏生。時伏生年

九十餘，老不能行，乃詔鼂錯往受之。史記

申公魯人，以詩經爲訓。天子使使東帛加璧，安車駟馬迎申公。申

公時已八十餘，天子以爲太中大夫，舍魯邸，議明堂事。



轅固生齊人以治詩爲博士病免今上卽位復以賢良徵固時固已九十餘矣。

伏恭以司空乞罷肅宗行饗禮以恭爲三老年九十。

後漢書

薊子訓有神異之道時有百歲翁自說童時見子訓賣藥於會稽市顏色不異於今後人復於長安東霸城見之與一老翁共摩挲銅人相謂曰適見鑄此而已近五百歲矣顧視見人而去。

華佗曉養性之術年且百歲而有壯容時人以爲仙。

陶弘景善辟穀導引之法年逾八十而有壯容仙書云眼方者壽千歲弘景末年一眼有時而方。

南史

新喻侯映爲北徐州刺史及徵還鍾離人顧思遠行部伍中映見

其老使人問之。對曰：年一百一十二歲。凡七娶，有子十二。死亡畧盡。今惟小者，年已六十。家闕養乏，是以行役。映大異之，賜之食。食兼於人，檢其頭有肉角，長寸。遂命後舟載還都。謁見天子，與之言往事，多異所傳。擢爲散騎侍郎，朝夕進見。年百二十卒。又普通中，穰城內有人，年二百四十歲，不能復食穀，惟飲曾孫婦乳。簡文帝命勞之，賜以束帛。荊州上津鄉人張元始，年一百一十六歲，膂力過人，進食不異。至九十七方生兒，兒遂無影。將亡，人人告別，乃終。湘東王愛奇重異，遂畱其枕。

孫謙爲光祿大夫，年逾九十，強壯如五六十者。每朝會，輒先衆到公門。末年，頭生二肉角，各長一寸。



羅結爲侍中。年一百七歲。精爽不衰。世祖以其忠慤。甚見信待。除長信卿。年一百一十。詔聽歸老。年一百二十歲卒。魏書

高允爲中書侍郎。雖年漸期頤。而志識無損。猶心存舊職。披考史書。卒年九十八。初允每謂人曰。吾在中書時。有陰德濟救民命。若陽報不差。吾壽應享百年矣。

尉元歷官司徒。高祖詔曰。前司徒山陽郡公尉元。大鴻臚卿新泰伯游明根。並知始知卒。希世之賢也。公以八十之年。宜處三老之重。卿以七十之齡。可充五更之選。於是養三老五更於明堂。

傅永歷官左將軍。年踰八十。猶能馳射。盤馬奮稍。諱言老。每自稱六十九。

甄權爲高醫。貞觀中已百歲。太宗幸其舍。視飲食。訪逮其術。擢朝散大夫。卒年一百三歲。唐書

白居易暮節稱香山居士。常與胡杲。吉旼。鄭據。劉真。盧真。張渾。狄兼謨。盧貞。宴集。皆高年不事者。人慕之。繪爲九老圖。

許瓊子永。罷盧氏縣尉。上言臣年七十五。父瓊年九十九。長兄年八十一。次兄年七十九。欲乞近地一官。以就養。太祖命其父赴闕。瓊得對於講武殿。詞氣不衰。上悅。其父子俱享遐壽。賜衣帶茶帛。授永郾城令。宋史

宰相文彥博致仕歸洛。與富弼。司馬光等十三人。用白居易九老會故事。置酒賦詩相樂。序齒不序官。爲堂繪象其中。謂之洛陽耆



英會。

宋濂致仕。太祖賜御製文集。及綺帛。問濂年幾何。曰。六十有八。帝乃曰。藏此綺三十二年。作百歲衣可也。

明史

胡濙歷事六朝。垂六十年。中外稱耆德。及歸。有三弟。年皆七十餘。鬚眉皓白。燕聚一堂。因名之曰壽愷。

馬文升爲吏部。年已八十。修髯長眉。遇事侃侃。不少衰。

翁正春拜禮部尚書。乞歸。光宗以正春嘗爲皇祖講官。特加太子少保。賜敕乘傳。異數也。時正春年逾七十。母百歲。率子孫奉觴上壽。鄉閭豔之。

侯官林春澤。歷南京刑部郎中。出知程番府。以大計免歸。年百歲。

有司爲建人瑞坊子應亮以戶部侍郎侍養亦年七十矣春澤起拜矍鑠如少壯獻徵錄

### 生日

皇覽揆余於初度兮肇錫余以嘉名離騷

唐太宗謂長孫無忌等曰今日吾生日世俗皆爲樂在朕翻成傷感今君臨天下富有四海而承歡膝下永不可得詩曰哀哀父母生我劬勞奈何以劬勞之日更爲宴樂乎唐書

宰相王欽若生日輦太常以金籠籠鴿以獻搢笏開籠一一放之每一放祝曰願相公一百二十歲倦遊錄

蘇東坡生辰置酒赤壁下笛聲忽起江上乃進士李委聞坡生日



作鶴南飛之曲以獻坡喜試令奏之曲音嘹唳有穿雲裂石之聲  
玉局文

張安道生日東坡以拄杖爲壽有詩曰先生真是地行仙住世因

循五十年

潛確類書

錢穆父生日楊次公畫老子出關圖作詩以獻曰秘藏函谷關中

子來獻蓬萊閣上仙願得鬚眉如此老却教龜鶴羨長年

雲齋廣錄

陳恭公判亳州遇生日親戚多獻老人星圖姪世修獨獻范蠡遊

五湖圖且贊曰賢哉陶朱霸越平吳名遂身退扁舟五湖公卽日

納節明年乞致仕

倦遊錄

魯鐸爲司業與祭酒趙永皆大學士李東陽門生也值東陽生日

相約以二帕爲壽。比檢筭亡有。徐曰：鄉有餽乾魚者，盍以此往詢諸庖，食過半矣。以其餘詣東陽。東陽喜爲烹魚，置酒，畱二人飲，極歡乃去。明史

### 嫁娶

昏禮：納采、問名、納吉、納徵、請期、親迎。

納采者，納鴈以爲採擇之禮也。問名者，問女生之母名氏。

也。納吉者，得吉卜而納之也。納徵者，納幣以爲昏姻之證也。請期者，請婚期也。親迎者，父醮子而命之迎，男先於女也。禮記

文王初載，天作之合，在洽之陽，在渭之涘。文王嘉止，大邦有子。大邦有子，倪天之妹，文定厥祥，親迎于渭，造舟爲梁，不顯其光。詩經

韓侯娶妻，汾王之甥，蹶父之子。韓侯迎止，于蹶之里，百兩彭彭，八鸞鏘鏘，不顯其光。諸娣從之，祁祁如雲。韓侯顧之，爛其盈門。



陳公子完奔齊。懿氏卜妻敬仲。其妻占之曰吉。是謂鳳凰于飛。和鳴鏘鏘。有嬌之後。將育於姜。五世其昌。並於正卿。八世之後。莫之與京。左傳

膠東王徹數歲時。長公主指其女阿嬌好否。對曰好。若得阿嬌。當以金屋貯之。主大悅。要上成婚焉。漢武故事

陽公雍伯。設義漿給行人。有一人就飲畢。出菜子一升與之。曰。種此生好玉。并得好婦。公種之數歲。北平徐氏有女。公求之。徐氏曰。得白璧一雙。當爲婚。公於所種處求之。得白璧五雙。以聘。徐氏愕然。遂妻以女。生十男。皆俊異。位至卿相。搜神記

溫公喪婦。從姑劉氏有一女。甚有姿慧。姑屬公覓婚。公密有自婚

意答云。佳壻難得。但如嶠比云。何姑云。喪敗之餘。乞粗存活。便足慰吾餘年。何敢希汝比。後少日。公報姑云。已覓得婚處。門第粗可。壻身名宦。盡不減嶠。因下玉鏡臺一枚。姑大喜。既婚。交禮。女以手披紗扇。大笑曰。我固疑是老奴。果如所卜。世說

令狐策夢立冰上。與冰下人語。占夢索統曰。士如歸妻。迨冰未泮。婚姻事也。君在冰上。與冰下人語。爲陽語陰。媒介事也。當爲人作媒。冰泮而婚成。會太守田豹。因策爲子求張公徵女。仲春成婚。晉書韋放。京兆人。與吳郡張率。皆有側室懷孕。因指爲婚姻。其後各產男女。未及成長。而率亡。放爲北徐州有勢族。請姻者。放曰。吾不失信於故友。乃以息岐娶率女。又以女適率子。時稱放能篤舊。梁書



孔淳之與王敬弘友。敬弘以女適淳之子。以烏羊繫所乘車轅。提壺爲禮。至則盡歡共飲。迄暮而歸。或問其故。答曰。此亦農夫田婦之禮也。南史

崔陵一門婚嫁。皆衣冠之美。吉凶儀範。爲當世所稱。婁太后爲博陵王納陵妹爲妃。敕中使曰。好作法用。勿使崔家笑人。婚夕。顯祖舉酒祝曰。新婦宜男。孝順富貴。陵曰。孝順出自臣家。富貴恩由陛下。北齊書

崔巨倫有姊。明慧有才行。眇一目。內外親族。莫有求者。其家議欲下嫁之。巨倫姑。趙國季叔眉妻也。聞之。慚感曰。吾兄盛德。不幸早世。肯令此女屈事卑族。乃爲子翼納之。時人歎其義識。北史

高祖后竇氏其父毅神武公嘗曰此女有奇相且識不凡何可妄與人因畫二孔雀屏間請昏者使射二矢陰約中目則許之射者閱數十皆不合高祖最後射中各一目遂歸於帝

唐書

東都裴尚書寬子孫衆盛實爲名閥天后時宰相魏元同選尚書之先爲壻未成婚而魏陷羅織獄家徙嶺表及北還女已踰笄其家議無以爲衣食資願下髮爲尼及荆門則裴齎裝以迎矣今勢利之徒舍信誓如反掌則裴之蕃衍乃天之報施也

郭元振少美宰相張嘉貞欲納爲壻曰吾女各有姿色但不知誰是配偶使五女各持一線於幔前取便牽之元振欣然從命遂牽一紅線乃第三女果有姿色

天寶遺事



唐盧儲舉進士投卷謁尚書李翱翱有女年及笄見卷曰此人必爲狀元李聞之乃招爲壻明年果首擢成婚之日儲作催粧詩曰昔年曾向玉京遊第一仙人許狀頭今日已成秦晉會早教鸞鳳

下粧樓

山堂肆考

郝質篤於信義官并代路都監與朝士董熙善約爲婚姻熙死家貧無依質已爲節度使竟以女歸董氏

宋史

黃龜年微時永福簿李朝旌奇之許妻以女龜年登第而朝旌已死家貧甚或勸龜年別娶龜年正色曰吾許以諾死而負之何以自立遂娶之

詹同幼穎異學士虞集見之曰才子也以其弟槃女妻之

明史

癡翁史思女笄當嫁壻家貧不能具禮詭詞攜之觀燈與其婦送之壻家大噉而去

列朝詩集小傳

### 生子

吉夢維何維熊維羆大人占之維熊維羆男子之祥乃生男子載寢之牀載衣之裳載弄之璋其泣嗶嗶朱芾斯皇室家君王

詩經

子生設弧於門左。男子生桑弧蓬矢六以射天地四方。

禮記

魯桓公六年夫人生子與桓公同日故名曰同。

史記

盧綰豐人也綰親與太上皇相愛及生男高祖盧綰同日生里中

持羊酒賀兩家。

漢書

漢武帝未誕之時景帝夢一赤彘從雲中下入崇蘭閣帝覺而坐



閣上有丹霞蔚鬱而起。乃改閣爲猗蘭殿。後王夫人誕武帝於此殿。洞冥記

桓溫生未朞。溫嶠見之曰。此兒有奇骨。可試使啼。及聞其聲曰。真英物也。晉書

王鎮惡以五月五日生。家人以俗忌。欲令出繼。其祖猛曰。此非常兒。昔孟嘗君惡月生而相齊。是兒亦將興吾門矣。故名爲鎮惡。宋書任遙妻裴嘗晝臥。夢有五彩旗蓋。四角懸鈴。自天而墜。其一鈴落入懷中。因而有娠。占者曰。必生才子。後生昉。南史

徐陵母臧氏嘗夢五色雲化而爲鳳。集左肩上。已而誕陵。陳書

宇文孝伯其生與周武帝同日。及武帝卽位。爲右侍上士。帝嘗謂

曰公於我猶漢高與盧綰也。

北史

張說母夢一玉燕自東南飛來投入懷中而有娠。生說。

天寶遺事

李白之生母夢長庚星因以命之。

唐書

范質生之夕母夢神人授以五色筆質後位宰相。

宋史

曹彬週歲日父母以百玩之具羅於前觀其所取彬左手提干戈右手取俎豆斯須又取一印餘無所視。

李至母張氏嘗夢八仙人自天降授字圖使吞之未幾生至至後位參政。

李顯忠初其母當產數日不能免有僧過門曰所孕乃奇男子當以劍矢寘母旁卽生已而果生顯忠立於蓐咸異之後官至節度



使。

楊洪裕少時。漁於貂裘陂。忽有馳騎至者。以二石鴈授洪裕。一翼掩左。一翼掩右。曰。吾北嶽使者也。言訖。忽不見。是年生女爲周祖淑妃。明年生子廷璋。家遂昌盛。

段少連母。嘗夢鳳集家庭。寤而生少連。後官至龍圖閣直學士。

楊奐母。嘗夢東南日光射其身。旁一神人以筆授之。已而奐生。其

父以爲文明之象。因名之曰奐。

元史

黃潛母。夢大星墜於懷。乃有娠。歷二十四月始生潛。迨長以文名。

官至侍講學士。

宣宗。仁宗長子也。母誠孝昭皇后。生之前夕。成祖夢太祖授以大

圭曰傳之子孫永世其昌。旣彌月。成祖見之曰。兒英氣溢面。符吾夢矣。

明史

楊惟禎母李夢月中金錢墜懷而生。

王守仁娠十四月而生。祖母夢神人自雲中送兒下。因名雲。五歲不能言。異人拊之。更名守仁。乃言。



穀玉類編卷十五

穀玉類編卷十六

休寧 汪兆舒果齋輯

懷感類二

疾病 死喪 親喪 喪妻 喪子  
葬 祭

疾病

士辭疾曰某有負薪之憂。禮記

堯以天下讓於子州支父。子州支父曰。我適有幽憂之病。方且治之。未暇治天下也。莊子

丙吉有舊恩。宣帝封爲博陽侯。臨當封。吉疾病。上憂吉疾不起。夏



侯勝曰。臣聞有陰德者。必饗其樂。以及子孫。今吉未獲報。而疾非死疾也。後病果愈。漢書

趙岐年三十餘。有重疾。卧蓐七年。自慮奄忽。爲遺令。勅兒子。其後疾瘳。年九十餘。後漢書

呂蒙定荊州還。疾發。孫權迎置內殿。所以治護者萬方。募有能愈蒙疾者。賜千金。時有增加。權爲之慘戚。欲數見其顏色。又恐勞動。常穿壁瞻之。見小能下食。則喜。不然則咄喑。夜不能寐。吳志

王仲祖病。劉眞長爲稱藥。荀令則爲量水。世說

裴俠位開府儀同。嘗遇疾。沈頓忽聞五鼓。便驚起。顧左右曰。可向府耶。所苦因此而瘳。晉公護聞之曰。俠危篤若此。而不廢憂公。因

聞鼓聲。疾病遂愈。此天祐其勤恪也。北史

李勣爲太子詹事。太宗謂可託大事。嘗暴疾。醫曰。用鬚灰可治。帝乃自剪須以和藥。唐書

廉希憲稱疾篤。皇太子遣侍臣問疾。因問治道。希憲曰。臣病雖劇。委之於天。所甚憂者。大奸專政。羣小阿附。誤國害民。病之大者。殿下宜開聖意。急爲屏除。不然。日就沈疴。不可藥矣。元史

余闕守安慶。號令嚴信。與下同甘苦。嘗病不視事。將士皆籲天。求以身代。闕聞。強衣冠而出。

宋訥爲祭酒。病。太祖曰。訥有壽骨。無憂也。遂愈。明史

### 死喪



天子死曰崩。諸侯曰薨。大夫曰卒。士曰不祿。庶人曰死。

禮記

歸死者曰賁。歸生者曰賻。

穀梁傳

子產聞子皮卒。哭且曰。吾已無爲爲善矣。惟夫子知我。

左傳

孔子早作。消搖於門。歌曰。泰山其頽乎。梁木其壞乎。哲人其萎乎。

旣歌而入。子貢聞之曰。泰山其頽。則吾將安仰。梁木其壞。哲人其

萎。則吾將安放。夫子殆將病也。遂趨而入。夫子曰。子疇昔之夜。夢

坐奠於兩楹之間。夫明王不興。天下其孰能宗予。殆將死也。蓋寢

疾七日而歿。

禮記

鍾子期死。而伯牙絕絃。破琴。知世莫賞也。惠施死。而莊子寢說言。

見世莫可爲語也。

淮南子

賈誼在長沙。鵬鳥集其承塵。長沙俗以鵬鳥至人家。主人死。誼作

鵬鳥賦。齊死生以遣憂累焉。

西京雜記

薤露蒿里喪歌也。出田橫門人至孝。武時分爲二曲。薤露送王公

貴人。蒿里送士庶人。使挽柩者歌之。

古今注

陳蕃竇武爲閹人所害。郭林宗哭之於野。慟旣而嘆曰。人之云亡。

邦國殄瘁。但瞻烏爰止。不知于誰之屋耳。

後漢書

鄭元以病還家。夢孔子告之曰。起起。今年歲在辰。來年歲在巳。旣

寤。以讖合之。知命當終。其年六月卒。

歲在龍蛇。賢人嗟元以讖合之。謂此

王戎嘗經黃公酒壚。過顧謂後車客曰。吾嘗與嵇叔夜。阮嗣宗。酣暢於此。竹林之遊。亦預其末。自嵇阮云亡。吾便爲時所羈紲。今日



視之。雖近。邈若山河。

晉書

向秀作思舊賦云。余與嵇康呂安。居止接近。其人有不羈之才。其後並以事見法。逝將西邁。經其舊廬。鄰人有吹笛者。發聲寥亮。追想曩昔游宴之好。感音而歎。故作賦。

昭明文選

陸機歎逝賦序曰。余年方四十。而懿親屬戚。亡多存寡。昵交密友。亦不半在。或所曾共遊一途。同宴一室。十年之內。索然已盡。以是思哀。哀可知矣。乃賦。

有人哭和長輿曰。峨峨若干丈松崩。

世說

衛玠卒。謝鯤哭之。慟。人曰。子有何恤。而致斯哀。答曰。棟梁折矣。不

覺哀耳。

晉書

顧榮素好琴。及卒。家人置琴於靈座。張翰哭之慟。旣而鼓琴數曲。撫琴而嘆曰。顧彥先復能賞此。不因又慟哭。

王獻之卒。兄徽之奔喪不哭。直上靈牀坐。取獻之琴彈之。久而不調。歎曰。嗚呼。子敬人琴俱亡。因頓絕。

司空庾亮薨。將葬。何充會之。歎曰。埋玉樹於土中。使人情何能已。羊曇爲謝安所愛。重安薨後。輟樂彌年。行不由西州路。嘗因石頭大醉。扶路唱樂。不覺至州門。左右白曰。此西州門。曇悲感不已。以馬策扣扉。誦曹子建詩曰。生存華屋處。零落歸山邱。慟哭而去。

謝敷。會稽人。入太平山十餘年。臺徵博士不就。初月。犯少微。少微一名處士星。占者以隱士當之。譙國戴逵有美才。人或憂之。俄而



敷死。會稽人嘲吳人云。吳中高士。便是求死不得死。

支道林喪法虔之後。精神實喪。謂人曰。昔匠石廢斤於郢人。牙生輟絃於鍾子。推已外求。良不虛也。冥契既逝。發言莫賞。中心蘊結。

余其亡矣。卻後一年。支遂殞。

法虔道林之同學。世說

蘇韶卒。其弟夢韶言。顏回卜商。俱爲地下修文郎。

王隱晉書

御史中丞任昉卒。殷芸與到溉書曰。哲人云亡。儀表長謝。元龜何

寄指南。誰託其爲士友所推如此。

梁書

庾詵晚年。尤遵釋教。夜中忽見一道人。自稱願公。呼詵爲上行先生。授香而去。中大通四年。晝寢。忽驚覺曰。願公復來。不可久住。言終而卒。舉室咸聞。空中唱上行先生已生彌陀淨域矣。

王規爲太子中庶子。卒。皇太子臨哭。與湘東王繹令曰。王威明風韻。適上神峰。標映實俊人也。一爾過隙。永歸長夜。金刀掩芒。長淮絕涸。去歲冬中。已傷劉子。今茲寒孟。復悼王生。俱往之傷。信非虛說。南史

鄧先生名郁。隱居衡山。天監十四年。忽見二青鳥。如鶴大。鼓翼鳴舞。移晷方去。先生謂弟子曰。求之甚勞。得之甚逸。青鳥旣來。期會至矣。少日而終。

侍中孫瑒卒。江總爲其誌銘。後主又題銘後十字曰。秋風動竹。烟水驚波。幾人樵徑。何處山阿。今時日月。宿昔綺羅。天長路遠。地久雲多。功臣未勒。此意如何。何時論以爲榮。陳書



柳弘爲御正大夫卒。楊素誅之曰：「山陽王弼風流長逝，穎川荀粲零落無時，修竹夾池，永絕梁園之賦；長楊映沼，無復洛川之文。其爲士友痛惜如此。」周書

李泌爲相，月蝕東壁，泌曰：「東壁圖書府，大臣當有憂者。」昔燕國公張說由是以亡，又可免乎？明年泌卒。唐書

韓琦以司徒判相州，薨。前一夕，大星殞於治所，櫪馬皆驚。宋史

辛棄疾嘗與朱熹游。熹歿，僞學禁嚴，門生故舊無送葬者。棄疾獨爲文往哭之，曰：「所不朽者，垂萬世名，孰謂公死，凜凜猶生。」

王恕卒，年九十三。平居食噉兼人。卒之日，小減，閉戶獨坐，忽有聲若雷，白氣瀾漫，矚之瞑矣。明史

史思自號癡翁。沈石田爲作詩曰。我顛與翁癡。癡顛相比肩。約爲老兄弟。逍遙覓彭篴。年八十餘。精強如少年。自知死期。預命發引。命親朋歌虞殯。相攜出聚寶門。謂之生殯。至期無疾而逝。列朝詩集小傳楊爵爲御史。以極諫符瑞。久繫獄。後得釋。居家二年。一日晨起。大鳥集於舍。爵曰。伯起之祥至矣。果三日而卒。明史

黃道周。精天文歷數。皇極諸書。所著易象正。三易洞璣。及太函經。學者窮年不能通其說。而道周用以推驗治亂。歿後。家人得其小冊。自謂終於丙戌年六十二。始信其能知來也。

### 親喪

庶見素冠兮。棘人樂樂兮。詩經



居於倚廬。哀親之在外也。寢苦枕塊。哀親之在土也。

禮記

居喪未葬。讀喪禮。既葬。讀祭禮。

高子羔執親之喪。泣血三年。未嘗見齒。君子以爲難。

孔子行。聞哭聲甚悲。至則臯魚也。孔子曰。子非有喪。何哭之悲也。

臯魚曰。吾少而學。游諸侯以後吾親。樹欲靜而風不止。子欲養而

親不待也。立槁而死。

韓詩外傳

王修母以社日亡。來歲鄰里社。修感念母哀甚。鄰里聞之。爲之罷

社。

魏志

王戎以母憂去職。容貌毀瘁。杖然後起。時和嶠亦居父喪。武帝謂劉毅曰。和嶠毀頓過禮。使人憂之。毅曰。嶠雖寢苦食粥。乃生孝耳。

至於王戎所謂死孝。陛下當先憂之。晉書

吳隱之執母喪。哀毀過禮。家貧無人鳴鼓。每至哭臨之時。恒有雙鶴警叫。時人以爲孝感所致。與太常韓康伯鄰居。康伯母殷每聞隱之哭聲。輒爲悲泣。謂康伯曰。汝若居銓衡。當舉如此輩人。

陶侃以母憂去職。嘗有二客來弔。不哭而退。化爲雙鶴。冲天而去。時人異之。

司馬昱年十二。丁內艱。哀慕過禮。毀瘠骨立。服闋。以姻戚子弟預入問訊。梁武帝見其羸疾。歎息久之。字其小字。謂其父子產曰。昨見羅兒。面顏憔悴。使人惻然。便是不墜家風。爲有子矣。南史

蕭放父卒。居喪以孝聞。所居廬室前有二慈烏來集。各據一樹。爲



巢每臨至舒翅悲鳴全似哀泣時人以爲至孝之感

北齊書

宗慄遭母憂去職哭輒嘔血每有羣鳥數千集於廬舍候哭而來哭止而去時論稱之以爲孝感所致

周書

侍御史陳孝意以父憂去職居喪過禮有白鹿馴擾其廬

北史

張九齡居父喪哀毀庭中木連理及爲中書侍郎以母喪解毀不勝哀有紫芝產坐側白鳩白雀巢冢樹

唐書

支漸年七十持母喪蓬首垢面三時號泣白雀白鳥日集於壘木五色雀萬餘回翔悲鳴若助哀者人以爲至孝所感

宋史

范祖幹事親孝父母皆八十餘而終家貧不能葬鄉里共爲營辦悲哀三年如一日有司以聞命表其所居曰純孝坊學者稱爲純

孝先生。明史

曹端遭二親喪。五味不入口。既葬。廬墓六年。

汧陽王誠冽。父薨。醯醬鹽酪不入口。明年。墓生嘉禾一本。雙穗。嘉瓜二實並蒂。慈烏異鳥環集。以母馬妃早卒。不逮養。追服衰食蔬者三年。雪中萱草生華。咸謂孝感所致。

### 喪妻

莊子妻死。惠子弔之。莊子箕踞鼓盆而歌。惠子曰。不亦甚乎。莊子曰。人且偃然寢於巨室。而我嗷嗷然隨而哭之。自以爲不通乎命也。故止也。莊子

符融貧。妻亡。無以殯殮。鄉人欲爲備棺服。融不受。曰。古之葬者。棄



之中野。唯妻子可以行其志。但卽土埋藏而已。鄉人歎其高卓。後漢書

陳化爲尙書令。妻亡。化以古事爲鑒。乃不復娶。孫權聞而賢之。以其年壯。勅宗正妻以宗室女。化固辭。權不能違其志。名益重。吳志

賈客張瞻將歸。夢炊曰中。以問卜者王生。王生曰。君歸不見妻矣。曰中炊無釜也。瞻歸。其妻已卒。酉陽雜俎

荀粲婦曹氏病亡。傳嘏往唁。粲不哭。而神傷。嘏曰。婦人才色並茂。爲難。子遺才而好色。此自易遇。何哀之甚。粲曰。佳人難再得。顧逝者不能有傾國之色。然未可謂之易遇。痛悼不能已。歲餘亦亡。晉書

孫楚除婦服。作詩以示王濟。濟曰。未知文生於情。情生於文。覽之

悽然增伉儷之重。

王維退朝之暇。以禪誦爲事。妻亡不再娶。三十年孤居一室。屏絕

塵累。舊唐書

趙惟新篤於內行。喪偶五十年。不再娶。明史

### 喪子

子夏喪其子而喪其明。禮記

延陵季子適於齊。其長子死。葬於贏博之間。旣封。且號者三。曰骨

肉復於土。命也夫。禮記

魏有東門吳者。子死而不憂。人問之曰。吾無子時不憂。今子死。乃

與無子時同。吾何憂。列子



豫章太守顧邵是雍之子。在郡卒。雍集僚屬共圍碁。外啟信至。而無兒書。心了其故。以爪掐掌。血流沾褥。賓客既散。方歎曰。已無延陵之高。豈可有喪明之責。於是豁情散哀。顏色自若。世說

王衍喪幼子。山簡弔之。衍悲不自勝。簡曰。孩抱中物。何至於此。衍曰。聖人忘情。最下不及於情。然則情之所鍾。正在我輩。簡服其言。更爲之慟。晉書

王祥二子烈芳同時而亡。將死時。烈欲還葬舊土。芳欲畱葬京邑。祥流涕曰。不忘故鄉。仁也。不戀本土。達也。仁與達。二子俱有。吾何傷焉。

王導子悅。官中書郎。先導卒。先是導還臺及行。悅未嘗不送至車。

後又恒爲母曹氏。襃斂箱篋中物。悅亡後。導還臺。自悅常所送處。哭至臺門。其母常封作篋。不忍復開。

庾亮兒遭蘇峻難。遇害。諸葛道明女爲庾兒婦。旣寡。將改適。與亮書及之。亮答曰。賢女尙少。固其宜也。感念亡兒。若在初沒。世說

江州刺史李基卒。其父申公穆每哭輒悲慟。謂所親曰。好兒舍我

去。門戶豈是欲興。周書

東野產三子。不數日輒失之。念無後。以悲。其友人韓愈懼其傷也。

推天假其命以喻之。作孟東野失子詩。韓文公集

### 葬

天子七月而葬。同軌畢至。諸侯五月同盟至。大夫三月同位至。士



踰月外姻至。

左傳

滕公駕至東都門。馬鳴蹏不前。使卒掘地。得石椁。有蝌斗書曰。佳城鬱鬱。三千年見白日。吁嗟滕公居此室。滕公死。遂葬焉。

西京雜記

袁安歷官司徒。初安父沒。訪求葬地。道逢三書生。問安何之。安爲言其故。生乃指一處云。葬此地。當世爲上公。須臾不見。安異之。遂葬其所占之地。故累世隆盛焉。

後漢書

太常趙岐先自爲壽藏圖。季札子產晏嬰叔向四像居賓位。自畫其像居主位。皆爲讚頌。勅其子死之日。便下。下訖便掩。

陶侃微時。丁艱。將葬。家中忽失牛。而不知所在。遇一父老。謂曰。前岡見一牛眠山汙中。其地若葬。位極人臣。又指一山云。此亦其次。

當世出二千石言訖不見侃尋牛得之因葬其處以所指別山與周訪訪父死葬焉自訪以下三世爲益州如其所言

晉書

吳明徹幼孤性至孝後欲葬父苦家貧無以助給乃勤力耕種足充葬用時有伊氏者善占墓謂其兄曰君葬日必有乘白馬逐鹿者經墳此是孝子大貴之徵至時果驗

陳書

裴俠年十三遭父憂將擇葬地而行空中有人曰童子何悲葬於桑東封公侯俠以告母母曰神也吾聞鬼神福善爾家未嘗有惡當以吉祥告汝耳俠宅側有大桑林因葬焉俠後官開府進爵爲公

北史

姚勗自作壽藏於萬安山祖崇塋之旁署兆曰寂居穴墳曰復真



堂中剝土爲牀曰化臺而刻石告後世。

唐書

司空圖隱中條山預爲冢棺遇勝日引客坐壙中賦詩酌酒裴回客或難之圖曰君何不廣耶生死一致吾寧暫游此中哉。

沈彬近居阜上有一大樹嘗曰吾死可葬此穴之乃古塚其間一古燈臺有銅牌上鐫篆文曰佳城今已開雖開不葬埋漆燈猶未

滅畱待沈彬來。

江南野史

張昱廬陵人爲江浙行省員外郎元亡畱居西湖貧無以葺廬酒間爲瞿佑誦所作詩笑曰我死埋骨湖上題曰詩人張員外墓足矣。

明史

祭



文王之祭也。事死者如事生。思死者如不欲生。忌日必哀。稱諱如見親。祀之忠也。禮記

羊元保歷官散騎常侍。自少至老。謹於祭奠。四時珍新。未經祠薦者。口不妄嘗。宋書

張沖監青冀二州刺史事。沖父初卒。遺命曰。祭我必以鄉土所產。無用牲物。沖在鎮。四時還吳國。取果菜。每至烝嘗。輒流涕薦焉。南齊書

胡叟少孤。春秋當祭之前。則先求旨酒美膳。將其所知。攜壺執榼。至郭外空靜處。設坐奠拜。盡孝思之敬。時汜潛家善釀酒。每節送一壺與叟。人謂潛曰。再三之惠。以爲過厚。子惠於叟。何其恒也。潛



曰我恒給祭者以其恒於孝思也。魏書

尚書左丞王存常悼近世學者貴爲公卿而祭祀其先但備庶人

之制及歸老築居首營家廟。宋史

王約歷官集賢學士歲時朔望攜子姓至先塋展拜懷戀謹時祭

及五祀動稽古禮邦人以爲矜式。元史

襄陵王冲炆憲王第二子有至性每展墓必率子孫躬畚鍤培冢

明史

穀玉類編卷十六







